



特 別
A18
4892
13



八18
4892
13



明詩綜卷三十三

小長蘆

朱彝尊

錄



西湖

湯右曾

緝評

呂

柟一首

柟字仲木高陵人正德戊辰賜進士第一累官

南京禮部右侍郎贈尚書謚文簡有涇野集

天津

天津城外水浮天海口東來萬里烟遙見帆檣雲外落

却疑日月鏡中懸鶴巢不避波濤險蜃閣常依島嶼連

愧是乘槎銀漢客幾回吟望斗牛邊

景

暘二首

明詩綜卷三十三

日言然卷三十三
賜字伯時儀真人僑居南京正德戊辰賜進士
第二仕至南京春坊中允掌國子司業事有前

溪集

顧華玉云中允詩主盛唐蕭散遺俗詞鋒沛發靡不中的 陳羽伯云公詩瀟灑直寫性情無論唐宋 歐楨伯云伯時文法

兩漢詩主盛唐與蔣子雲趙

叔鳴朱升之號江北四子

靜志居詩話前溪集久遂失傳從盧子明廣陵詩選錄得二首其與陳

玉泉論詩云辭取達意若惟以摹擬為工尺寸寸按古人之跡務求

肖似何以達吾意乎

蓋亦矯北地之弊者

懷水部蔣子雲

碁局經旬隔壺觴勝引稀蕭條憐我輩鄰比有漁磯雲
竹晴還雨風花落更飛相期過山館小坐可忘歸

送陳戶部南使

使節乘春色家園喜便過草堂寒雨細江壘晚雲多綠

柳臨岐折青驪傷酒歌仍聞赴吳會勝事更如何

王崇慶

二首

崇慶字德徵開州人正德戊辰進士累官戶部
尚書贈太子少保有端溪先生集

送馬守之澤州

寂寞山城裏春風未有花野塘新水細茅店酒旗斜故
國音書斷長安道路賒何時共知己傾倒酌流霞

舟次德州

遠浦漁舟小寒天柿葉稀歸心正愁絕一雁夕陽飛

唐

龍 七首

龍字虞佐蘭谿人正德戊辰進士累官太子太

保吏部尚書卒贈少保謚文襄有漁石集

王元美云唐虞

佐如苦行頭陀終少玄解 穆敬甫云唐公詩若甲冑明光赫然耀日

顧玄言云文襄風度瓌爽頗臻古雅 陳臥子云漁石五言本之少

陵已涉藩籬

漸窺堂奧

詩話文襄數歷中外宦轍所至必有留題其詩長於五律句如鶯花邊地少風雨暮春多雲氣雨中白山光鳥外青斷湟春水淺亂石曉山稠赤峽青冥外飛泉急雨中星臨河影動風入鼓聲高野水流漁市山雲進郭門雪埋青兕叫霞引白駕飛細雨孤帆落疎燈兩岸明巖林遺宮殿畎畝變秦川野鹿避人走山禽向我啼凍雲投浦宿倦鳥逐風回百里郵程遠三更候吏稀殘棋榕葉暑嫩蟾菊花天巖置成樓直峰懸鳥道斜客身病亦起短髮落還梳竹外青藜杖風前細葛巾移松邀老圃失鶴問前村均有風致

送李拱元歸田

春月白如雪春山青如銅楊柳未堪折歸客何怱怱三徑命中車五湖漾孤篷從茲謝塵鞅陶然隱者風廣結桑麻交遠尋麋鹿蹤洪淵縱文魴遙漢矯冥鴻嗤彼風

塵子胡乃長書空

雨懷

二首

細細風前斷疎疎葉上聞亭臺隱山霧城郭入溪雲轉益鄉愁亂還憐世事紛早秋身似雁天外獨思羣萬樹秋雲裏孤山細雨時江泥沾落絮花霧困游絲懷抱為誰好親朋已久辭東溪讀書處一水護青帷

冬至

天涯長至日燈下遠遊人薄祿家猶賴休官話未真歲時愁不住形影自相親幸有梅花發寒香可結鄰

赦書坪渡渭

渭北津多柳荒荒野色連十家橋外市雙櫓峽中船冰

響潛魚聽沙明過鳥憐蹉跎歸色晚風雪又殘年

成縣馬融絳帳臺

太守傳經地檐輿趁月行栗亭秋雨歇魚峽夜川明竹
外雙旌出沙邊一吏迎荒臺迷絳帳失學媿諸生

送蔣石菴赴湖南

細雨移尊日溪亭送客時風塵千里別宇宙幾人知雪
夜山陰興春天渭北思老來鄉社裏杖屨更追隨

毛伯溫

三首

伯溫字汝厲吉水人正德戊辰進士除紹興府
推官徵拜河南道御史歷按福建河南湖廣陞
大理寺丞擢都察院右僉都御史巡撫寧夏山

西順天回理院事陞右副都御史工部尚書改
兵部從駕南征加太子太保天啓初追謚襄懋
有東塘集

詩話東堂數與夏公謹李獻吉方
思道相酬和故其詩頗具風格

鹽池驛留別張僉憲

共事未半載何當別怱怱對酒不能言沙磧驚寒風
秋矣西夏區邊儲恒不充霜早歲常歎役繁民多窮
四時勞守堠終日事臨戎衣單腹不飽目擊心以恫
多君計慮周每與愚議同正當期展布方念蘇疲瘡
慚余但謀始仗君還圖終愍此邊塞苦慎勿墮前功

夜泊富陽

秋夜江風急樓船水月明汀洲散漁火烟樹隱山城雁
逐星河沒蟲依草岸鳴鄉心愁欲絕何處擣衣聲

鄰霄臺和丁近齋

殊方久客情能遣高閣同登意忽開過日高帆過西峽
霾雲古樹壓南臺沙村近帶農田出海岸遙看賈舶來
醉下虛亭尋古迹斷碑危碣半莓苔

周金一首

金字子庚南京右衛籍武進人正德戊辰進士
累官太子少保南京戶部尚書贈太子太保謚
襄敏有上谷漁洋二豪

九日中山道中憶故園諸子

攬轡川原秋日晴岳蓮高竝海雲生天涯佳節愁中過
塵世歸心夢裏驚懷李街頭船傍屋通吳門下水連城
登臨忽憶當時事落帽風流何限情

潘鑑二首

鑑字希古婺源人正德戊辰進士累官兵部尚
書兼右副都御史提督兩廣贈太子太保謚襄
毅有古泉集

錢家兄希仁

寒雁叫汀洲歸程不可留聊攜季路榼相送仲宣樓歲
晚荆門樹風微漢水舟鄉心吾欲折行役幾時休
奉謝中丞北湖公以丹砂見寄

郢雪催殘臘荆雲繫病身雁過南岳近書在北海頻梅
福非凡吏桃源別有春丹砂開寶訣攜我出風塵

陳達甫云後半

有逸趣

寇天敘一首

天敘字子惇榆次人正德戊辰進士除南大理
評事進左寺副遷寧波知府歷應天府丞以都
察院右僉都御史巡撫宣府改撫治鄖陽再改
巡撫甘肅入為刑部右侍郎以憂歸補兵部右
侍郎有涂水集

題画

十月梅花開已多蹇驢衝雪野橋過亦知金紫趨朝貴

奈此當前清興何

歐陽鐸一首

鐸字崇道泰和人正德戊辰進士歷官吏部右
侍郎贈工部尚書謚恭簡有恭簡公遺集

次萍鄉

明發宣風館秋陰得氣饒雲昏山欲斷泥濘路偏遙近
縣峰頭塔橫江屋底橋舊時銅漏刻強半土中焦

王應鵬四首

應鵬字天宇鄞縣人正德戊辰進士累官右副
都御史協理院事有定齋集

李杲堂云先生詩渾涵高脫即置諸開元之際可謂
大家其視學畿內告誡諸生以為學先立志不得輕議正人長者自絕
於名教文章無徒仿摹字句其中索然致貽學術之禍一何深中後來

學者之病痛切其言之也

和淵明雜詩二首

神京四千里遙途今已逼楊柳何蕭蕭秋風吹長陌雲
深塞草黃露重秋江白仰視天宇寬俯覺微軀窄對景
斯悵神當秋頻作客忽憶四明山山中有舊宅

藹藹王朝士謀國如苞桑良穀非不多焉用存秣糠懶
昔宣尼子栖栖亦絕糧鼎烹不足致時運有陰陽義命
儻如此飢來非所傷白雲思故都皎月明東方安得夙
心人共此今夜觴

次瓜州有述

鑾輿將出狩邏騎已先征淮北三年水江西六月兵已

應經睿覽未許括蒼生直北天王地星河永夜橫

曉發淮口

春江歷歷水悠悠一夜東風五兩收花信不知何地早
鄉書猶憶故園秋年來國是誰能定病起詩懷祇自愁
昨日六飛巡幸後已將寬法遍南州

韓邦奇二首

邦奇字汝節朝邑人正德戊辰進士歷官浙江
僉事轉山西參議擢僉都御史撫山西入為兵
部侍郎進南京兵部尚書以地震陷死贈太子
少保謚恭簡有苑洛先生集

送唐中丞撫蜀

聖主憂全蜀中丞出上台蠶叢橫地出熊軾倚天開節
鉞分封陞風霜動柏臺莫辭前路險後命已相催

再過褫亭

野戍淒淒画角山城處處寒砧最是秋風羈客不堪暮
雨鄉心

韓邦靖

六首

邦靖字汝慶邦奇之弟時號二韓正德戊辰進
士除工部員外乾清宮災應詔陳言繫錦衣獄
奪官為民起山西左參議有五泉集

王敬夫云五泉
古歌詞浸淫初

唐間逼漢魏七言絕句詩類少陵
顧之云參議詩道暢時有新語
詩話五泉心慕手追乃在大復比於西原
南冷不足方之孟有涯李嵩者似勝一籌

晚坐

遙峰羅夕日高原藹秋陰天風自何來吹我芳樹林寒
蟬發哀調蟋蟀嗣其音歲月日以暮霜露日以深相思
不自遣無乃勞君心持君一杯酒聊以開鬱沈

聞雁

鳴雁蕭蕭下寒燈故故明角聲傳細雨雲色度高城兄
弟無書信乾坤有甲兵秋風歸未得見爾不勝情

寄楊侍御師文

逐客地雖僻故人情不疎已勞千里駕復覩數行書別
思梅花後春風蕙草初江亭一杯酒何日話相於

中秋同何仲默望月

日言錄卷三
令節他鄉酒關山獨夜情看花秋露下望月海雲生碧
漢通查近朱樓隔水明南飛有烏鵲作意向人鳴

聖駕西巡歌

渥洼龍馬屬天閑沙苑牛羊入大官八府三邊俱望幸
九重十月未回鑾

谷太監出軍歌

五千精銳下良鄉雲裏旌旗鬪日光諸將不知中使貴
夜來馬上別君王

方鵬十一首

鵬字時舉崑山人正德戊辰進士歷南京武選
郎擢山西提學副使以疾辭用薦徵拜春坊庶

子遷太常卿有矯亭集

周子顛云太常詩
尚典雅不事雕琢

詩話矯亭古詩効陶近體學白頗饒自得之趣其自題小像云此像何
人斯吳淞方矯亭頗記前身事生可六七齡一疾遽天死天地為晦冥
蒼頭抱我哭諸婦慟拊膺其家乃城居面北高檐楹臨街列屠沽陰風
助哀聲思之宛如昨語及輒涕零性靈想不寐還復得此生乃知記憶
前身事匪獨
鮑井羊環也

感寓二首

昔從京師歸賀客來滿屋家人紛治具牽羊就屠戮斯
須立階除羊忽跪而伏亟命舍之去何忍見穀餼君子
克是心當使萬物育如何一命士分符作民牧誅求入
膏髓鞭撻爛肌肉置之囹圄中死者十五六安得如此
羊食飽卧林麓

縣尉謹修職屢受上官答同僚狡而貪臺章交薦之泣

與妻子謀歸去寧寒飢夷蹠旣莫辨守此復何爲

知足吟 三首

人見白髮悲我見白髮喜多少賢達人不見白髮死高
才李長吉有道文中子行年未三十相與歸蒿里吾生
已倍之對鏡宜莞爾

昔解晉皋組出處頗合宜不幸賤姓名誤爲當道知有
詔落致仕再起職論思人皆爲我榮我心獨不怡終然
野鹿性不能受銜羈蹤跡日以遠音問日以稀當道赫
然怒奮筆逐去之人皆爲我惜我心樂不支豈惟全晚
節亦以釋羣疑地下見先子庶幾無媿辭

山谷忤時宰連貶至宜州僧舍不容居置之南戍樓無
奈風雨寒一疾竟勿瘳苟無期功親棺殮誰與謀予今
老牖下骨肉聚牀頭但見眼前樂不知身後憂康哉復
康哉地下從黔婁

紀異

壬辰夏孟月旣望夜入酉東鄰李氏子年可十八九門
外聞作聲蓬蓬似鼓缶開門出視之四鬼捧其首踰牆
更越樹勢若風雷吼捧至野廟中亂被老拳毆父母競
號呼蹤跡竟無有親鄰各燃炬訪覓遍林藪夜半忽自
歸狀貌殊獰醜其身長丈餘見者駭而走入門還復短
瞪目但搖手母妻環問故稍語即閉口青紫色浮面縲
縛痕映肘僵卧三日甦不能記誰某此理終莫詰語怪

戒魯叟

西洲和時鳴韻

水雲深處卜幽栖不減夔州舊灤西寒雨渡頭孤艇沒
夕陽江上遠山低養馴白鴨當門浴種就黃蘆與屋齊
未識東山歌舞地祇將尊酒對山妻

留都將歸先呈未齋

羞將白髮戀京華已辦歸裝路不賒旋買雞豚投里社
敢驅鵝鴨惱鄰家春風枕上聞啼鳥秋水溪頭看泛槎
莫道山翁無一事借書沽酒亦生涯

生日招遠林

勞勞六十又三年半在愁邊半客邊假我餘生還對酒
與人多忤合歸田花前卧疾妨春事枕上敲詩失夜眠
此日江村期一醉淺沙深竹繫吳船

丙申新正試筆和舍弟韻

七十行年祇欠二清時無補自知慙輕寒枕上慵朝起
細雨尊前劇夜談春意熙熙人自樂病懷黯黯我何堪
賣花聲在東風外紅白江梅共一擔

偶作

靜掩荆扉送夕曛幾株殘菊散幽芬一燈影射青綾被
雙杵聲催白練裙老去閒思多舊事客來清話半新聞
酒錢藥價粗能備莫怪先生懶賣文

方鳳一首

鳳字時鳴鵬弟同榜進士官監察御史有改亭

集

周子籲云時鳴負氣不肯詭隨於時肆志自適詩亦豪俊

閒居

自入春來日日閒柴門無客晝長關枕書榻倚階前樹
對酒牕開屋後山葉暗新枝花盡落泥添故壘燕初還
近來識得全生術不放愁催兩鬢斑

邵

銳一首

銳字思抑仁和人正德戊辰進士歷官太僕寺
卿贈右副都御史謚康僖有端峰存彙

荅程以道見寄之作兼簡徐用先

近得遼陽信含情仔細看念君同患難垂老各平安野
望餘沙漠邊愁重苦寒尺書艱往復惟有勸加餐

孫

壘一首

壘字朝信平湖人正德戊辰進士官至山西按
察僉事以子植貴贈刑部尚書有峰溪集

關索嶺

萬里雲南路三年始得歸野梅渾破萼官柳半垂絲嶺
峻盤空險城尖壘石危邊疆據形勝天畔控諸尼

程啓充一首

啓充字以道嘉定州人正德戊辰進士任監察
御史贈光祿寺少卿

塞下曲

黑龍江上水雲腥女直連兵下大寧五國城頭秋月白
至今哀怨海東青

戴冠七首

冠字仲鶚信陽人一云吉水人正德戊辰進士授戶部

主事以建言貶廣東烏石驛丞起戶部員外出

知延平府改蘇州終山東提學副使有邃谷集

俞汝成云仲鶚聲調宏邁話意勁拔慨激昂有古

國士風穆敬甫云戴詩如丹崖綠水澹然有味

詩話仲鶚與仲默同鄉里詩亦同調謂之具體可爾或言其五言律勝於仲默豈篤論乎

曉發

村雞喔喔啼取火照行李隔離謝主人出門渡溪水仰
觀羅浮嶺白雲猶未起

立春日舟中題

作客尚無地他鄉空復春舟中兒女大天未歲時新樂
事喧殊俗窮愁縛遠人椒盤懷故里腸斷白頭親

南夏

不作炎州客那知宇宙偏日車淹北戶火樹爍南天氣
溽乘宵雨雲蒸挾暮烟波斯夸白氎出入不曾捐

寄王德徵登州

王子十年別封書萬里來乾坤知汝在涕淚向誰開海
國青春隔天隅白髮催相思一搔首獨上越王臺

人日游石磔

人日尋春到海隈新年物色太相催風吹燕子家家入

暖逼桃花樹樹開久住山林殊自適頻來峒客更無猜
黃柑白酒能消渴盡日松間坐不回

雨晴出左掖

北闕春雲散曉扉西山雪日弄晴暉雨聲恨不連三日
松樹須教過十圍歲遠玉螭書未有晝長金馬詔全稀
侍臣欲老惟疎放自歎從容退食歸

贈甘惠州

四百雲峯面面開使君花底放衙回人生豈必二千石
只看羅浮也合來

陸震一首

震字汝直蘭溪人正德戊辰進士以車駕員外

郎抗疏劾江彬逮繫三杖而死嘉靖初贈太常
寺少卿

詩話太常力批龍鱗九死不悔裏尸之後晝晦如夜海子水溢玉河
七鐵柱齊折天變豈不足畏耶詩存無多錄四十字一字一碧血也

朝房待罪

驥尾思千里葵心託萬言一身曾許國九死敢忘恩梅
福冠猶在朱雲檻不存空庭對明月古道照乾坤

祝鑾二首

鑾字鳴和當塗人正德戊辰進士以祠部郎諫
南巡廷杖仕至廣東布政使有篁溪集

感興

公輸構大廈一人操引繩羣工雖不同各各奏其能用

人不求備負荷隨所勝所以無棄材百堵由茲興或者
太區別聞之為撫膺

仙源

仙源何處來無乃自天上不然瀑布泉那得千萬丈

方豪六首

豪字思道開化人正德戊辰進士除崑山知縣

陞刑部主事諫南巡杖闕下起湖廣僉事進副

使有棠陵集

顧玄言云方詩多出少陵蹊徑錢受之云思道探奇歷勝與鄭繼之同好詩多率易信口急就似

又出繼之之下陸次友云棠陵與孫鄭衿契最深其才辭敏不及二子遠矣

尋王粲樓故址

仙子乘雲去不還空餘詞賦落人間高樓試問今何處

故老相傳是此山極目平原空悵望側身塵界欲飛攀
漳沮秋淨征鴻下越客悲吟鬢已斑

游桃花寺

聽說桃花寺游人興不禁桃花今不見流水尚堪尋

看月

看月月轉明幽人寂無語山空秋夜長松露濕如雨

滄江吟

白髮滄江酒一尊丹楓赤壁自成村沙鷗汀雁真吾侶
垂老何曾識縣門

題画

亂山兩岸一江橫烟樹濛濛雨乍晴釣艇自來還自去

江風不動水禽鳴

鴛鴦湖

鴛鴦湖邊落日明荷花十里櫂歌聲
丈人自折碧筒飲醉看秦塘海月生

馬錄二首

錄字君卿信陽衛籍紹興山陰人正德戊辰進士授固安知縣擢監察御史有百愚集

霸州城行

霸州城外水繞牆霸州城頭戍卒強
四門高樓接烟霧縈迴十里多垂楊
去年豺虎滿天地此城南北皆戰場
至今落日照白骨血霑野草猶淋浪
當時別縣人皆走

此城之人苦相守五馬使君身姓王
募招壯士犒牛酒遂令萬夫同一心
彎弓罵賊不絕口固安與霸為鄰縣
此事分明眼中見乃知設險可守邦
區區省費非民便永清遇雨作

白日永清雨移時不肯休風前當檻落
河漢近城流牛馬誰堪辨蛟龍恐亦愁
西歸途路失何處問孤舟

張綸一首

綸字理之錦衣衛人正德戊辰進士官按察使
僉事嘉靖初以議大禮謫戍雲南

錦衣獄中

重門扃夜月鈴柝轉深更客夢秋能作
扉燈曉尚明君

臣今古義兒女歲時情起把青銅對愁憐白髮生

胡纘宗 二首

纘宗字孝思一字世甫鞏昌人一云山西文水人正德戊

辰進士特授翰林檢討外補嘉定州判移守潼

川遷南戶部郎中改吏部出知安慶府調蘇州

升山東參政改浙江歷河南布政使以右副都

御史巡撫山東改理河道乘輿幸楚纘宗作詩

記事為戶部主事王聯所訐逮下獄尋放歸有

烏鼠山人集袁永之云先生詩出入漢魏其視昌黎少陵若弗屑者而亦未始不合也 王元美云胡孝思如嬌兒郎

愛吳音興到即謳不必合板 蔣仲舒云中丞天質穎敏亦一關中之雋第命意淺率不足多傳

詩話孝思詩未入格顧沾沾自喜到處留題當永陵南巡作詩紀事有云穆王八駿空飛電湘竹英皇淚不磨用事殊不倫乃刻之於石致騰

讒者之口其得免死幸也謝山人榛贈詩云白首全生逢聖主青山何

意見騷人時孝思年將八十矣杖劍呻吟猶占韻以謝其意氣有不可

及者然詩實牽率晉江王道思序之稱其宏深精毅感歸美於秦風毋亦嗜秦人之炙者與

擬古 二首

驚喜君王至西華夜啓扉後車三十乘載得美人歸

詩話康陵西幸悅樂戶劉良女遂載以歸貯之騰禧殿號曰夫人及南

巡日帝期以中途召之夫人脫簪予帝以示信帝騎過盧溝亡之大索

不得也行至臨清念夫人召之以不見簪不往帝不得已兼程抵潞河

載夫人偕南寺觀幡幢列鎮國公號復繫以名夫人每得並書嘉靖初

納南京給事中王紀之言俾盡撤去然夫人在途常諫帝游獵非專以色固寵者烏鼠山人是詩直書其事亦取禍之萌也

上馬入黃城嫖姚典禁兵猶言恩寵薄下馬坐團營

丁奉 二首

奉字獻之常熟人正德戊辰進士除行人歷南

京吏部驗封司郎中有南湖留臺

詩話南湖詩不事鍛鍊與酣落筆往往暗合曩篇句如白蘋風外水紅葉雨中山徑轉花間月山飛樹杪泉夜橋喧客櫂曉確起鄰燈菜甲今朝雨蒲香隔岸風人當紅樹坐船觸白蘋行白髮生秋日黃花惜暮年山寒松子落籬暝豆花深俱有風韻即嘔心撚髭者為之不過爾爾

擬古

白日墜西山明朝出東海天地無終期萬物豈能待
花重露零高岸深谷匯昨見朱顏酡今看霜鬢改
登蓬瀛蓬瀛果誰逮

寄尤少卿宗暘

張翰歸時計亦疎秋風寂寞始登途不思五月清江上
已有鯉魚勝玉鱸

曾璵一首

璵字東玉瀘州人正德戊辰進士由戶部郎出

知建昌府有少岷存橐

詩話王新建定寧庶人之亂吉安守伍公文定固稱首功同時贛州則當塗邢珣袁州則武邑徐璉臨江則臨海戴德孺饒州則晉江林城廣信則閩周朝佐撫州則鄞陳槐建昌則少岷也其師至雖有後先寔同力共濟少岷有收復南康功而不見錄纂修地志者皆沒其實故表出之詩雖未名家亦清脫無塵氣

南洲歌

南洲春早江蘿生南洲日長沙鳥鳴郎君莫向北湖去
不似南洲烟水平

錢琦二首

琦字公良海鹽人正德戊辰進士授盱眙知縣
歷南京刑部郎中出知臨江府調思南有東畬

集

顧玄言云臨江詩冲秀飄揚彭子殷云公良詩春容馴雅每入唐人庭奧

登獻花巖

獻花巖畔寺游子數登臨花發年年好巖深處處陰風
前收落果坐久換鳴禽世路何多事看山偶會心

過滁州

江北滁南數日程蕭蕭落木送秋聲夕陽滿地鳥飛絕
人在亂山堆裏行

凌

楷一首

楷字端甫揚州通州人正德戊辰進士官部
郎中

高郵

孟城勞悵望烟樹一浮洲地濕人多病林寒葉易秋人
家留鳥跡國稅獨漁舟夜月珠光在多應照客愁

駱用卿

一首

用卿字原忠餘姚人正德戊辰進士官兵部員
外郎

題韓信廟

逐鹿中原漢力微登壇頓感楚軍威足當躡後猶分土
心未猜時尚解衣畢竟封侯符蒯徹幾曾握手到陳豨
英魂漫灑荒山淚秋草長陵久落暉

李獻吉云此題
淮陰廟絕倡也

徐

愛一首

愛字曰仁餘姚人正德戊辰進士除知祁州歷
官兵部郎中有橫山集

黃太冲云文成之學得曰仁而門
人益親曰仁之亡文成有祝子之

勸其詩力未深
而不落凡俗

紀游

壁磴臨絕壑兼乘欲疲馬屢盤羊腸出還驚虎領下逼
險悔初進稍縱覲復假如何窮探心阻困每未舍無端
覓憂虞中止固由我回思競利人何殊履危者

陸伸一首

伸字安甫太倉人正德戊辰進士官大理評事

河間道中

荒田殘雪啄飢鴉握粟謀炊野店家辛苦莫辭行路遠
冷風三日下午牛車

田惟祐二首

惟祐字裕夫蕭山人正德戊辰進士有滄螺集

詩話裕夫領解浙闈時名蔚起今則知者寡矣詩如
王謝子弟雖未陶鑄毋論風流文采裙屐亦自不同

龍游至衢州

龍游接衢州景不殊蘭溪山少灘瀨多沙石成長隄溪
流時衝決兩岸無平蹊湍急舟行速水淺石可攜野曠
少人烟地瘠艱鋤犁泊舟無村市遇夜隨停棲幸無狂
客驚惟聞山鳥啼船定水汨汨蓬疎風淒淒寤寐夢不
成候曉無鳴雞惆悵盼家山遙遙望中迷

晚登城樓懷友

江城天暝夕陽微拍拍輕鷗逐浪飛水郭烟光迷野屋
海天風色上征衣倚樓長笛家何在出浦扁舟人未歸

愁絕知心成兩地目隨征雁思依依

黃卿一首

卿字時庸益都人正德戊辰進士歷官江西布政使有編茗集

三關書事

曾聞甲戌邊聲急白首追談足愴神子女牛羊充塞窟
旌笳駝馬暗風塵山埋戰骨雲長慘野哭驚沙草不春
舊日僨軍今甲第大廷持法是何人

童寬一首

寬字栗卿蘭溪人正德戊辰進士監察御史改調平陽推官

雨花臺

阿師何術隕天花臺迴登臨望眼賒百里晴山圍帝宅
六朝芳草入僧家層層樹色寒烟合歷歷車聲古道斜
鐵鎖銷沈龍戰後落潮處處咽江沙

明詩綜卷三十三

明詩綜卷三十四

小長蘆 朱彝尊 錄

具區 徐德夏 緝評

楊慎 二十五首

慎字用脩新都人正德辛未賜進士第一授翰

林修撰以議大禮泣諫杖謫永昌天啓初追謚

文憲有升菴集

薛君采云用脩窮極詞章之綺麗牢籠載籍之菁華其卓絕之才弘博之學直欲追軋古人

張愈光云升菴詩予不喜其深遠而喜其朗爽也 王元美云楊用脩

如暴富兒郎銅山金埒不曉喫飯著衣又云用脩工於證經而疎於解

經詳於禪史而忽於正史詳於時事而不得詩旨求之宇宙之外而失

之耳目之前又云徐昌穀有六朝之才而無其學楊用脩有六朝之學

而非其才又云楊修撰之南中臺禮麗婉至華學士之巖居臺清澹簡

遠俱遠勝玉堂之作 穆敬甫云用脩學富于古人謂其詩不逮學然

其詩亦非貞元以後語也 陳德遠云用脩詩取材六代間似杜陵

王藩臣云先生詩時而漢魏時而六朝時而四傑時而李杜其於才無

所不構而於體無所不兼 顧玄言云修撰咀英搜玉咳唾成珠 陳
玉叔云用脩采摭既富蹊徑終存近體多深沉之思絕句極風人之致
又云用脩著書百餘種時分宜故相乞品詩於萬里外司空劉元瑞得
神樓曲棲息終身其珍重如此至海內名流若永昌張愈光謂其立朝
去國弘業葆貞華容孫仲可謂其幼通廣畜名高衆忌嘉州程給事謂
其稗官小說因微適道崑山周太僕謂其權衡操縱合英茹實四明張
司馬謂其片詞纖指根治古初太倉王廷尉謂其才情蓋代使事最工
即諸家品而用脩可知也 黃清甫云楊詩喜用僻事多著浮彩搜羅
刻削無出其右而駢繪既繁性情多盡傳謂美能沒禮詩亦有之至誦
其可憐風雨夜長在客塗中又江花與江草異國看春生情境俱窮真
堪隕淚 李時遠云用脩評他人詩精當不可假借其所作未必如所
許亦人才之通弊也 胡元瑞云用脩才情問學在弘正後嘉隆前挺
秀合作者殊自斐然又云皇甫子循以六朝語入中唐調而清空無迹
楊用脩以六朝語作初唐調而雕繪滿前故知詩有別才學貴善用
錢受之云用脩垂髫賦黃葉詩為茶陵文正公所知登第又出門下詩
文衣鉢實出指授及北地多言復古力排茶陵海內為之風靡用脩乃
沈酣六朝攬采晚唐創為淵博靡麗之詞其意欲壓倒李何為茶陵別
張壁壘不與角勝口舌間也援據博則對錯良多摹仿慣則瑕亦互見
竄改古人假託往籍英雄欺人亦時有之要其鈞索淵深藻彩蔚會自
足以牢籠當世鼓吹前哲膚淺末學趨風仰止固未敢抵隙蹈瑕橫加
訾毀也 陳附子云用脩解尉之中時見新警 宋轅文云用脩病在

貪博故使事處往往求巧得拙要
其天才本是奇麗真如七寶流蘇
靜志居詩話虞伯生告素伯長云文章之妙惟浙中庖者知之若川人
之為庖也麤塊而大鱗濃醢而厚醬非不果然饜也而飲食之味微矣
浙中之庖則不然凡水陸之產皆擇取柔甘調其滑齊澄之有方而潔
之不已視之泠然水也而五味之和各得所求羽毛鱗甲之珍不易故
性為文之妙亦猶是耳讀用脩詩無異川人之庖矣予為
之調擇澄潔去其濃醢厚醬蓋竊比於浙中之庖之義云

行旅

行旅苦日短勞人知路遙忽忽歲云暮客心中搖搖曠
野積寒氣四望但寂寥嚴霜下豐草朔風鳴枯條浮雲
起為蓋堅冰結為橋白日隱餘照玄雲掩層霄鳴轂無
停輪嘶馬不解鑣飛鳥夕知還征塗何迢迢無以慰苦
辛興言自成謠

三岔驛

三岔驛十字路北去南來幾朝暮朝見揚揚擁蓋來暮
看寂寂回車去今古銷沉名利中短亭流水長亭樹

賦得千山紅樹圖送楊茂之

蕭郎雅工金碧畫愛畫碧雞與金馬畫作千山紅樹圖
行色秋光兩瀟灑搖落深知宋玉悲登山臨水送將歸
丹林初曉清霜重紫谷斜陽赤燒微故人辭我故鄉去
滇樹遥遥接巴樹桑落他山共醉時楓香客路銷魂處
白首遐荒老未還流波落木慘離顏錦城紅樹那能見
千里隨君夢裏攀

錦津舟中對酒別劉善充

錦江煙水星橋渡惜別愁攀江上樹青青楊柳故鄉遙

渺渺征人大荒去蘇武流離十九年誰傳書札上林邊
北風代馬南枝鳥腸斷當年蜀國絃

送余學官歸羅江

豆子山打瓦鼓陽坪關撤白雨白雨下娶龍女織得絹
三丈五一半屬羅江一半屬玄武我誦棉州歌思鄉心
獨苦送君歸羅江浦

宿金沙江

往年曾向嘉陵宿驛樓東畔闌干曲江聲徹夜動離愁
月色中天照幽獨豈意飄零瘴海頭嘉陵回首轉悠悠
江聲月色何堪說腸斷金沙萬里樓

山行即事

明詩紀卷三十四
桐子花開映村塢單衣初試貧兒舞春寒已過四十五
十二月朔旦南郊扈從省牲

天仗雲門外宵衣曉漏前蒼龍旂影動朱鷺鼓聲傳星
爛甘泉燭霜清泰時煙南郊新警畢重觀孝皇年

方思道云得初

唐體

咸陽

帝里繁華歇神皋歲月多秦城依北斗渭水象天河顏
堞無遺土驚川有逝波丘陵沉霸氣松柏起悲歌

青橋

聞道盤雲棧郵亭枕水涯猿猱臨客路雞犬隔仙家風
起青丘樹春迷玉洞花旅懷今日豁停幘問袞斜

送高公次長洲尹

祖帳燕臺下官曹震澤東星躔牛斗近地脈海潮通新
水催飛鷁微霜度早鴻循良多暇日題詠繼文雄

寄石季瞻赴臨安謫

聞道炎方謫遙從瘴海過後期淹歲月前路任風波霄
漢蜚鴻遠關門虎豹多卜居何處問薜荔在山阿

送周子庚都憲撫邊

肅肅戒嚴程蕭蕭邊

一作班

馬鳴龍庭新節制騎省舊才名

玉律調秋氣金鏡寢夜聲隴雲笳外結關月笛中明鸞
朔臨秦障鶉瓢繞漢城沙汀行見鴈海樹坐聞鶯游霧
懷前賞歸風逆別情佇聽歌凱入一舉塞垣清

送客

合尊且醉花間分襟易慘愁顏朝下春風紫陌天涯落日青山美人明月相望游子浮雲獨還愁見河橋柳色勞歌一曲陽關

春興

最高樓上俯晴川萬里登臨絕塞邊碣石東浮三絳色秀峰西合點蒼煙天涯游子懸雙淚海畔孤臣謫九年虛擬短衣隨李廣漢家無事勒燕然

中秋禁中對月

漢家臺殿號明光月滿秋高夜未央銀箭金壺催漏水仙音法曲獻霓裳路車天遠鸞聲靜宮扇風多雉影涼千里可憐同此夕美人迢遞隔西方

懷歸

星橋南望沉犀渚雪嶺西連抱珥河關塞渺茫魂夢隔山川迢遞別離多汀洲春雨搴芳杜茅屋秋風帶女蘿心事未從詹尹卜生涯聊聽熒童歌

李君偕過皋橋新居言別

沙門草閣對漁舟坐俯昆池萬里流蕭索暮塗猶浪迹登臨暇日豈銷憂阮公失路誰青眼江令還家尚黑頭行見羣英滿青瑣寧忘一老在滄洲

竹枝詞

夔州府城白帝西家家樓閣層層梯冬雪下來不到地

春水生時與樹齊

滇海竹枝詞

東浦彩虹懸水樁西山白雨點寒江煙中艇子搖兩槳
空裏鷺鷥飛一雙

自注滇人喚
虹霓為水樁

寄遠曲

濯錦江頭煙水綠相思萬里人如玉瑤琴別後不曾彈
今朝才理將歸曲

江陵舟中贈田李二子

落月寒沙夜未分玉簫金管醉中間明朝回首沅江路
愁聽清猿和白雲

望中條山

征馬長鳴向北風崢嶸關回首暮雲東太行過盡中條出
一路青山白雪中

于役江鄉歸經板橋

千里長征不憚遙解鞍明日問歸橈真如謝朓宣城路
南浦新林過板橋

贈箏人

綺筵雕俎喚新聲博取瓊花出玉英肯信博陵崔十四
平生願作樂中箏

張壁一首

壁字崇象石首人正德辛未進士改庶吉士累
官太子太保禮部尚書東閣大學士贈少保謚

文簡有陽峰家藏集

尹巽峰遣祀衡山得配字

天王御宸位相國熙帝載維時肇初元秩禮肆禋類皇
皇遣近臣肅肅將遠賚顧茲南嶽鎮而與朱鳥配星分
當翼軫地望等恒岱坤維得良止后土資負載祝融正
盤紆靈爽豈茫昧巽峰天下士祇命壘壤內晨裝發潞
河夕舸達江匯犧宰設衡幅虞人剪荒穢再宿整襟冠
二薰潔醇醑樂張洞庭野紉憶蘭芷佩探歷道彌廣登
覽神愈倍禮成眷桑梓敬止重風槩秋徂命倅人星言
理征駮於皇念啓沃遲子日展對悽惻懷修塗音塵慰
寮寀

王以旂一首

以旂字士招江寧人正德辛未進士累官太子
太保兵部尚書兼右都御史贈少保謚襄敏有
石岡集

九日登長城關樓

邊塞高登百尺樓遙天極目迴消愁穹廬遠向西番徙
烽火無勞內地憂四野牛羊隨處牧千家禾黍滿場收
喜看安阜叨清宴醉倚黃花插白頭

孫承恩一首

承恩字貞父松江華亭人正德辛未進士歷官
太子少保禮部尚書兼翰林學士掌詹事府贈

太子太保謚文簡有使郢臺

經孟浩然故里

孟六亦高人神思乃清朗讀書陋拘牽制行喜疎曠賦詩妙天趣力索不可仿沖融大雅音金石振遺響禁中遇天子召對心所向終焉意不合歸哉南山放唐詩盛千古公也李杜行布衣一時窮高譽後人仰我來經故里慨矣勞緬想鹿門當時月依依漢江上

王道一首

道字純甫武城人正德辛未進士改庶吉士歷官吏部右侍郎贈禮部尚書謚文定有順渠文

錄

詩話順渠說經不謂宋人理窟詩雖無意求工亦少習氣

過舊居有感

破屋頽垣是幾年重來下馬一悽然丁寧好護門前柳曾繫詩人萬里船

汪玄錫一首

玄錫字天啓婺源人正德辛未進士選給事中陞太僕卿擢都御史巡撫江西入為戶部侍郎卒贈尚書有東峰集

朝鴉

景陽鐘動曉鴉飛漢殿千官拜玉墀仙仗纔移東殿去翩翩棲滿萬年枝

陳達甫云此可徒初入掖垣時作也託喻可想

許成名 一首

成名字思仁聊城人正德辛未進士改庶吉士

授編修歷諭德進侍讀學士遷太常寺卿掌國

子祭酒陞禮部右侍郎有龍石橐蘇穀原云龍石詩
清新俊逸健拔謹

嚴 朱中立云龍石詩氣
平音和蓋晚唐之佳者

西師

上谷烽煙猶未定西戎消息近如何莎車空憶班都護

銅柱曾聞馬伏波鐵騎休論榆塞險羽書今報劔門多

何時籌策銷金甲會見旋師振玉珂陳用亶云詩亦具體特銅
柱鐵騎金甲未免近複爾

屠 徑 一首

徑字直卿鄆縣人太保瀟子正德辛未進士官

吏部郎中

夜聞笛

夢破寒猶重更長客更愁何人吹短笛今夜在南樓

屠 僑 二首

僑字安卿鄆縣人正德辛未進士累官太子太

保左都御史贈少保謚簡肅有東洲雜橐

江頭晚步

薄晚江行意若何夕陽微影漏林柯綠厓白鳥沙痕淺

隔岸青山塔影多下網人聽潮外語入村船載渡頭歌

觀瀾不用登遐絕百里蛟門送海波

雨夜泊塘棲

出關彌望凍雲低
畫鷁迎春未試題
四十五程燈火夜
一川風雨泊塘棲

柴奇一首

奇字德美崑山人
正德辛未進士
歷官應天府

尹有黼菴遺橐

鄒謙之云黼菴胸無城府言無粉繪行無機詐詩文皆典雅雄健不落翫骸不矜刻峭周子顛云京兆詩文雄麗拂鬱有氣

勉聞姪

汝父三十三一疾棄諸孤
汝母二十九赤手抱二雛
辛勤二十年完此身後圖
汝兄亦已矣所望在汝軀
汝今逾三十尚爾在泥塗
年齒日已長歲月易以徂
父書能讀否狂藥曾戒無
汝若不努力何以慰老夫
繆天自云語雖淺而不庸

汪文盛一首

文盛字希周崇陽人
正德辛未進士
除饒州府推官
入為武選主事
諫南巡廷杖嘉靖初出知福州府
歷官按察使以僉都御史巡撫雲南
進大理卿有白泉集

西苑

萬年枝上露華清
百子池邊月色明
宮草經秋猶自碧
君王御輦不曾行

郭維藩一首

維藩字价夫儀封人
正德辛未進士
歷官太常寺少卿兼翰林院侍讀學士
掌院事

送高穎之少卿赴南都

廣陵別後金陵別舊歲君來今歲歸回首十年猶反掌
含情千里各沾衣江萍逐櫂隨流水雲樹連天入翠微
卿佐官閒南國勝湖山清賞莫相違

郝鳳升 二首

鳳升字瑞卿汀州衛人正德辛未進士大理寺
副有九龍山房集

聖駕入城

警蹕都門裏傳呼天子歸有生皆帝德不怒自民威衣
帶千金誓湯城萬里圍自今歸馬後紫極但垂衣

無題

來去渾疑雲雨蹤楚王宮北數聲鐘情當厚處翻成怨
淚到乾時不覺濃煙縷湘裙飛蛺蝶玉屏羅幕墮芙蓉
月中剩有森森桂遮却清光第幾重

游 璉 一首

璉字世重連江人正德辛未進士歷官廣東按
察副使有少石棗

興田道中

興田驛路人家遶煙火依稀出遠山簾圍秧分疎雨外
茶煙人語亂雲間半生戀闕心空赤五馬之官鬢欲斑
獨坐肩輿懷正惡武夷遙望一開顏

汪必東 一首

必東字希會崇陽人正德辛未進士歷官河南
參政有南雋集

過劉家隔

崛起劉家隔周流漢水川白連雲夢澤青帶郢門煙蜂
蟻偏屯聚魚鹽競貿遷最憐貧土著蒿裏剪桑田

齊之鸞 十五首

之鸞字瑞卿桐城人正德辛未進士改庶吉士
授刑科給事中歷吏兵二科左右給事世宗即
位考察謫崇德縣丞移知長興縣稍遷南京刑
部郎中以陝西按察僉事巡寧夏升副使改河
南再改山東終河南按察使有蓉川集

汪可亭云
公屬文藻

麗不尚奇澀而語意新妙詩有一韻疊至數十首者搜探奇崛毫末不
遺他人多即難工公有餘力矣 錢飲光云公詩文妙當世開吾鄉風
氣之始文絕去枝蔓直據所欲言詩有氣力精采往往造出人意表大
抵一意孤行無所依附 潘蜀藻云讀齊公南征紀行入夏錄未嘗不
嗟咨歎詠以為沉鬱渾脫大得
灑西之傳北地猶去而千里

詩話蓉川在給舍最為敢言侃侃不阿止康陵罷設花酒店不當論威
武大將軍功寧庶人造龍艘戲劇潛結近侍邀帝南幸圖謀不軌行有
日矣借邢給事案許給事復禮留駕及康陵親征又作回鑾賦以諷且
力白王新建之誣洵骨鯁之臣也顧見容於康陵而不容於永陵何哉
及入西夏值旱澇之餘見居人刈蓬科其類有棉蓬刺蓬二種子皆可
以為麪饑民藉以充腹取而啖之苦惡辛澀乃封題以進且言國家有
大可憂之事三廟謨有深可惜者四斥及議禮大臣并責永陵不能虛
己可謂言人所不敢言矣入夏諸詩山川險隘誦之有如聚米與尹僉
事耕竝工惜乎志邊
關者均未之采錄也

晚宿良鄉

我行至良鄉車駕已臨涿官藏供億煩吏走威勢捉人
馬正饑疲晚得粟一握華館據高軒敞廬聊破幄階前

樹却佳綠葉未全剥獨坐新霽清悠然念盤錯自顧章
句生胡此擁矛稍感時不成寐起視明河數月色忽半
窗枕上聞吹角

龍門龕

伊水出龍門疏鑿惟禹績溪縈匯澄潭雲斷劃絕壁泛
舟巡南厓諸龕空翠滴遠疑穴陶復近聽境寥闕黃冠
一人來導我縱幽覲何年驅鬼工深窟隱金狄頽然丈
六身大小隨利剔旁有鈺鼓鳴愚氓伺考擊自從拓跋
來事佛轉成癖荒哉魏王泰孝誠空爾激不知文德賢
坤美符帝錫天堂無則已有則必登歷何事石上災千
古不可滌無乃託親名志祈潛奪嫡欲為生民主先被
河神溺向使正儲位亦終貽唐感經行謾誅心期使來
者惕

稠桑道中望黃河

桃林蟠土山谷入昧所出地底無傷風天際有中日仰
視耕穫人轉折忽相失仄登蟻緣枝幽盤蠹閉帙僕夫
虞殞傷及汗更股粟伊予慕昔賢馭吏屢遭叱徑盡躡
河壩黃流過箭疾踰關勢彌雄四鬣奔馬逸不知真宰
意何貴砥柱窒汜濫民其魚豈止桑田溢三門中古開
神禹功誰匹至今沮洳場盡作秔稻窟吾生髮半蒼世
路十不一及茲瞻華嵩眼豁心神狹向來險遠虞茲晨
憂已釋

寧州曉發

燈火啓嚴城戴星行未已夜來下絕坂左右崇墉倚昏
黑迷前旌時顧斗杓指晨雞登頓初險澀曙光紫林原
衍山巔溪壑行地裏坡陀首乾龍浮立土不滓所以穴
居民患燥不患水改邑視井泉卑棲固其理耕者百仞
上汲者千尋底下山阻深溝上山據高壘四鄰守無虞
塞馬徒為駛民貧獨可憂咸秦此脣齒

書郾城縣臺壁

長路淹炎日驅馳損壯心倦便雙柏坐幽伴一蛩吟嘉
穀連河內飛蝗度汝陰經過見人樂亦足豁煩襟

邠州曉發

二首

殘月征人早州城奧窅聞呼船渡涇水立馬望幽山禾
黍高低壟煙雲遠近關誰能渠白石種稻濁泥灣
涇北山橫絕穿厓細路高偏懸疑有麓峻極乃平皋嶺
露催禾黍秋風颯芋袍憂勤見遺俗無地立蓬蒿

靈祐驛次毛東塘韻

江路盤山轉頽垣此驛亭塞雲風外白畦菽露中青鳥
雀無歸樹驂騑不在垆誰教心匪石自信跡如萍

元旦次潘大行宗魯韻

三朝待漏趨金闕五拜瞻天散紫宸宦跡只尋常裏過
皇圖又十四回新花邊劒佩明初景塞外旌旗駐早春
安得封疆倚頗牧坐紓北顧埽蜂屯

將至荏平

長塗秋暮馬駢駢風起塵高雉堞微蟬到夕陽聲更急
樹經寒露葉初飛正聞老母平安信兼喜中丞克捷威
揚策不知行色倦欲沽村釀解朝衣

謁范韓祠

拓跋餘兇勢更張二公相望屹金湯一堂俎豆瞻遺像
萬古河山識巨防賈策清時薪抱火虞淵昏夜日重光
秋陰晝轉空階樹恨入邊烽照朔方

赤木裏口墩下坐憩

赤木空濛翠接天懸車路杪下烽煙須驅虎北馮金塔
更走龍南跨玉泉青草谷中兼得水白雲巖下盡堪田

奔馳庶竭涓埃報心苦三陞版榦前

過田州故城

河外軍藩麥秀中唐兵昔數朔方雄韓公北築三城路
至德中興一旅功番刻勁銷春薛碧漢花穠映寺門紅
高雲不罩田州塢水鶴歸巢夏暮空

九日塗次登清水關城

朔方三度重陽節河曲干旌歲歲忙鬢髮已甘塵路白
菊花猶見塞垣黃中丞疏有回天力太宰功無縮地方
雲外好呼南去鴈繫書先為報江鄉

渡河六言

有意唱籌益粟無神驅石修邊四月黃沙八渡雙旌紫

塞三年

毛憲一首

憲字式之武進人正德辛未進士官禮科右給事中有古菴集

詩話古菴講學主道南書院詩非所長具體而已

題扇

雲山擁前溪竹樹倚厓石晴風駕扁舟興到任所適水色與天光上下涵一碧習靜久忘機魚鳥亦馴格誰知至樂心物類固無隔

周廷用四首

廷用字子賢華容人正德辛未進士授宜黃知

縣入為御史外補僉事參議福建備兵四川進

江西按察使有八厓集

顧華玉云子賢才稟超融文鋒迅湧援筆長賦爛然成章錢受之

云華玉於子賢極相推挹然其詩粗豪奔放往而不返蓋楚士之有才情而不諳於格調者詩話八厓放言忤俗東橋深惜之國寶新編以之為殿贊云按察人豪闊視放言文藻性成早垂鉅篇然製作庸庸求其鉅篇頗罕

池上晚坐

皎鏡淨方塘月波涵一碧潏灩照脩篁風聲鳴瑟瑟愛此澹忘歸呼童卷湘帙清籟動我衣微露潤我幘繁星燦以羅羣蹠久復寂冲曠得所怡稅駕將何適

攢宮

宋家陵墓滿空山北望嵩丘路險艱一代龍蛇逢未運百年鳧鴈出塵寰空聞玉椀金城返不見旌旗瀚海還

無限鼎湖湘水怨白雲斑竹淚潛潛

經廣武城

廣武城邊草樹青濁河波浪晝冥冥天呼垓下真龍起
事異鴻溝白馬刑日晚沙場留返照秋風燐火亂殘星
英雄自古功無敵阮籍狂言未可聽

過灤東

灤東灤西雲日晴官船撾鼓上灘行不憎檣燕風前語
最愛山花雨後明杜甫草堂元地勝孔明圖陳自天成
明朝豔潁瞿塘上却望連雲棧閣橫

孫繼芳 二首

繼芳字世其華容人正德辛未進士除刑部主

事改兵部歷員外諫南巡廷杖尋遷郎中出為
雲南提學副使有石磯集

送徐太史使遼府

節重天王使情親帝子家雲霄三殿詔波浪九江槎庾
亮樓前月湘娥廟裏花金樽高宴罷須擬弔長沙

北征還朝凱歌

牙旗寶蓋耀星文椅鹿牽羊總百羣二十四通催羯鼓
帳前齊賀大將軍

李際元 一首

際元陽穀人正德辛未進士歷官按察僉事

雙流次韻

鼓角催晨發川原藹暮陰小溪清見石新柳細垂金洞
迴雲依樹山深鳥隔林天涯看落月盈縮飽經心

盧 雍 一首

雍字師邵吳縣人正德辛未進士官監察御史
有古園集

泊頭晚泊欲訪子濟侍御不果

河流寒未凍市集晚猶喧日落新橋驛煙生獨樹村沙
船露燈影灘石帶冰痕不見西臺客幽懷誰與論

王 璜 二首

璜字廷實濬縣人正德辛未進士除陝西道御
史巡按浙江

雲中歌 二首

潮湧雲屯外四家操回馬首帶金花行人莫笑應州小
武廟當年駐翠華

雲州城外日風沙雲州城裏日繁華金釵行酒將軍喜
醉倒銀壺小校家

徐 咸 五首

咸字子正海鹽人正德辛未進士除知沔陽州
入為兵部主事歷官襄陽知府有東濱稟

詩話東濱為豐厓同母弟兄友皆嫺風雅歸田後築園城闈名曰餘春
中疊石為小東山與錢東畬太守朱西村山人輩結小瀛洲十老社其
後倭人入寇所在焚儲積遂舍園基以為倉焉句如路自窮厓入人如
倦鳥還千年牛首寺一勾虎跑泉客醉黃花酒僧供白雪餅棘林花落
子萌屋燕將兒山遠不聞漏
夜寒疑有霜頗類賈島佛

井南社飲得影字

層樓俯青林芳筵接高迴衆賓來逶迤被服野而整時
維迓寒候風日不作冷江梅泄春香鳴禽戀餘景時物
適我懷忘却酒力猛飄風吹人衣素髮颯垂領浩歌入
城闈海鶴振孤影

石首蓬萊閣

蓬萊高閣臨清漢閣下風濤日夕撞花日映紅明霽野
草煙浮綠翳晴窗雕闌遠挹荆南勝玉笛新開洞府腔
悵望謫仙何處去娟娟秋月照澄江

夜坐

涼飈落長松明月出東嶺空山夜無人玄鶴不聞警

西園雜詠

南園老梅苦寂寞移種北園臨小池却憐池水淨如鏡
照見橫斜三兩枝

湖上

涌金門外水青青倒浸西山似画屏十里煖風魚浪細
扁舟忽過望湖亭

趙

漢二首

漢字鴻達平湖人正德辛未進士除建昌推官
入為給事中轉山西參政有漸齋集

泊瓜州

山寺清鐘曉江帆細雨秋瓜洲三日泊不為阻風留

湖上

鳥入山光去舟分樹影過秋江平似掌何處起風波

南大吉 二首

大吉字元善渭南人正德辛未進士授戶部主事歷郎中出知紹興府有瑞泉集

詩話元善好青紫囊書妙善占墓其守紹興謂定石非禹葬處別於廟東南建豐碑題曰大禹陵其後望秩於是處焉五言詩頗穩帖無秦人之氣

聞駕幸朔方

鐵騎綠沉槍傳聞下朔方紫臺邊月白青海陳雲黃寢閣雞聲早行營虎步長巡游稱聖世車跡到幽荒

和馬仲房雨

涼風吹晝雨蕭颯自西岑細細綠郊迴霏霏度關深雙虹明夕照萬戶動秋砧為想西征輦應停北塞陰

常倫 五首

倫字明卿沁水人正德辛未進士除大理評事

謫壽州判官遷知寧羗州有評事集 王元美云常明卿如沙苑兒駒

驕嘶自賞未諧步驟 陳卧子云明卿氣骨高朗頗能自運

望山有懷故居

羈步局重城流觀狹西野高高見西山鄉愁冀傾寫天際望不極延佇一瀟灑落葉歸故根山雲滿秋櫛無情尚有適何以慰離者

客行篇寄山中所知

日言終卷三十四
客行千里道塵土緇裳衣鬱鬱胡不樂思欲復西歸逝
者如斯夫朝露待日晞人生一世間乃與願相違黃鵠
舉何迴鷓鴣棲何卑撫劍獨嗟吒臨歧浩徘徊因風寄
黃綺管晏非所希

和王玉溪過韓信嶺

漢代推英武將軍第一人禍因躡足功大不謀身帶
礪山河舊丹青祠廟新長陵一坏土寂寞亦三秦

竹

庭竹娟娟色虛堂肅晚陰翠交紅果潤清蔭碧苔深涼
月侵冰簟流風送玉琴歲寒終不改長此護雙林

采蓮曲

素月開歌扇紅蕖豔舞衣隔江聞笑語隱隱櫂歌歸

俞璋一首

璋字朝相崑山人正德辛未進士官大理評事

上方

山寺晝陰寂綠蘿覆繩牀乍愛石苔古忽聞蘭草香遠
樹多暮色幽泉有深光持此積喧意來訪逍遙場

頓銳九首

銳涿州人正德辛未進士官戶部主事一云長史有鷗

汀漁嘯集

詩話長史時名籍甚北人語云涿郡有才
才一石銳得其八詩頗警拔微嫌冗長耳

樓桑廟迎送神曲二首

明言錄卷三十四
帝子降兮范之陽，况臨睨兮舊鄉。山蒼蒼兮水泱泱，神之來兮驂駟虬。玉鸞鳴兮啾啾，雲車兮羽蓋。樓桑陰兮蔽芾，牲既肥兮酒香。總帷施兮雕玉牀，荃高坐兮樂未央。帝子去兮安之，違桑梓兮心孔悲。白帝城兮永安宮，魚之腹兮蠶叢巫。陽雲雨兮洞庭波，雖信美而非吾土兮。矧蛟鰐與鼃鼉歸來兮，歸來其樂兮如何。

銅雀妓

西陵芳草合松柏，半為新宮殿。飛銅雀下飲漳河，濱檀烟冷餘燼。總帳網流塵，白頭歌舞妓來教晉宮人。

出聖水關往鳳皇山寺

鐵峻攢沱寥參差，入烟霧塗疑鬼工。鑿石截亂流渡詰曲，駭千轉坦蕩不數步。陰厓匯靈淵，未冬已寒沍。欲上仍趨趨，先登必奮怒。谷響雜鼃鼉，澗蹤過狐兔。斷徑屢猓接，傾巖數狼顧。肆貪興會奇，強制心膽怖。睨憎仄磴危，足試欹岑固。漸與人世隔，遂愜平生慕。絕塵乃無地，升天疑有路。得意真忘言，無心忽成句。象設教莫祛，烟霞疾已痼。空寂排冥詮，清虛獲玄悟。塵網奄頽齡，恨為造化誤。

臯湖秋晚

木落天宇清，草枯風力勁。平湖著微霜，摧此萬荷柄。蓴收浸無權，玄冥欲司政。遠山寒更翠，積水曠而瀨。湘娥

理晨妝髻髮墮明鏡輕颺漾淪漣碧綠交掩映水鳥各
沉浮游泳自其性安得金石膏瘡我山水病

湖莊秋事

郊墟絕喧阓村落斷輪鞅况茲千頃湖初秋減新漲無
日不沉山有風即生浪微波淨漣漪晴宇墮空曠野服
時登臨箕踞衡阜上興闌聊詠歸扶將獨藜杖鹿門龐
德公栗里陶元亮如此足百年外無分寸望

觀鬪蟋蟀

蟋蟀著豳風泉壤恒食息迎陰已振羽欲鳴先鼓翼候
氣感化機吟秋率其職於世無所爭豈有剛督力都緣
助人意自負萬夫特見敵豎兩股怒鬚如卓棘昂藏忿

塞胃彭亨氣填臆將搏必踞蹲思奮肆陵逼既却還直
前已困未甘踣雄心期決勝壯志冀必克依稀觸與蠻
蝸角並開國人生亦類斯駒隙競失得知雄守其雌老
氏有淵識

房山孔水洞

石竇水拖練靈源地絕塵浪傳飛白鼠無處隱蘋鱗入
夏桃花盡經春荇葉新輕舸不可入豈有避秦人

西巡曲

飛輪擊水日三千咫尺長安在日邊試向茂陵高處望
未央前殿立銅仙

王 溱 一首

日言綜卷三十四
三十一
溱字公濟開州人正德辛未進士除沁水知縣擢廣西道御史出知平陽府遷鹽運使致仕

落星寺別蔣南泠

別意隨流水迴船過落星湖光侵寺碧山色入簾青鷗鷺馴沙岸魚龍駭石汀虛堂歸興渺烟浪晚冥冥

陸倕一首

倕字天爵號桃谷吳縣人正德辛未進士歷官

寶慶知府

岳東伯云桃谷早登仕籍無暇篇章晚就操觚遂趨多士靈心夙構穎悟居多朝夕苦吟已收時論蓋能守約

少陵之方博施唐人之作者也

酬劉子古鏡

古鏡不自惜遙緘千里音懸懸照肝膽奚啻雙南金貞

質凝精光螭盤古銘深明月入我懷聊復理吾簪與君別幾時鬢髮雪已侵冉冉悲年暮悠悠空陸沉願言保不缺報君久要心

明詩綜卷三十四

明詩綜卷三十五

小長蘆 朱彝尊 錄

雪苑 宋 筠 緝評

唐 臯 一首

臯字守之歙縣人正德甲戌賜進士第一授修撰進侍講學士

明妃曲

黃金不買畫圖中從此春花閉漢宮到得君王識傾國無人主議罷和戎

蔡 昂 一首

昂字衡仲山陽人正德甲戌賜進士第三除翰

林編修累官禮部左侍郎贈尚書有頤貞堂
送朱伯仁任四川行都司斷事

白帝秋風動烏蠻夕照含憐君游宦處地勢極西南殊俗聊相問軍謀亦共參雄飛方自此休說鬢鬢鬢

霍

韜一首

韜字渭先南海人正德甲戌進士累官太子少保禮部尚書兼翰林院學士贈太子太保謚文敏有涓厓文集

贈方棠陵用陶飲酒韻

張弓射飛鳥巧者猶能得君子履周道豈爲多岐惑義命良獨安行止順通塞遠之垂萬世近之範一國珍重君北行時哉惟語默

劉儲秀

一首

儲秀字士奇咸寧人正德甲戌進士繇刑部主事累遷湖廣按察使歷戶部侍郎仕至兵部尚書

送龍長史之武昌

荆衡山漠漠江漢水湯湯送汝從茲去何時到武昌楚筵堪設醴漢署憶含香北上多鴻鴈音書好寄將

簡

霄二首

霄字騰芳新喻人正德甲戌進士累官南京兵部右侍郎有蓉溪集

過雪垣番寨

雪垣傷流沙風烟幾十家蓬頭男跽菁編髮婦耕畬皮
甲張藤盾毛衣綴線麻也知天子使羅拜接江涯

潞河舟中作

潞水經年別風塵又覺非岸蘆迎櫂舞檣燕掠人飛澤
國魚梁竭江城候吏稀人烟沙草外一縷起斜暉

陸杰一首

杰字元望平湖人正德甲戌進士授兵部主事
諫南巡廷杖後遷陝西按察副使終工部侍郎
有集

客舍

行役殊無已其如歲晏何宦情因拙澹鄉夢入秋多月
巷千砧發霜天一雁過吾廬今夜好可惜掩松蘿

吳鎧二首

鎧字文濟陽穀人正德甲戌進士授行人擢監
察御史升福建按察副使歷陝西參政雲南按
察使終僉都御史

書營平侯祠壁

白草連天遠黃雲出塞平霜笳吹漢月寒笛弄秦聲北
海猶傳箭西戎未息兵屯田當寧意寧惜度金城

涼州

聞道涼州戍連年去未回健兒多戰死曠騎至今來白

骨紛無數黃雲慘不開
龍城秋夜月羌笛不勝哀

林大輅 二首

大輅字以乘莆田人正德甲戌進士以工部員外郎諫南巡予杖繫獄謫判夷陵州嘉靖初起江西按察僉事歷副都御史巡撫湖南自劾歸

有愧瘖集

林茂貞云二山詩在仕途者忠憤激烈無依阿取容之態在林居者冲適雅淡無憤時嫉世之心要皆出於性靈非騷人墨客風雲月露之作也 王應時云二山詩典麗雋遠宋入堂奧 謝山子云林詩樸厚可比蔡忠惠 林雨可云二山詩鍛鍊而自然

靜志居詩話二山與南冷最相契詩亦近之第稍遜耳品當在李川父孟望之間

弔馬伏波祠

野渡維江舸荒祠薦澗片魚龍喧永晝日月照迷津阻

絕征蠻路艱危報主身只今嗟蕙以臨弔幾傷神

蔣子雲都水定居西長安門外

南冷三載賦閒居春日長安近卜廬苑樹飛烟分客榻
禁鐘浮月散朝車揚雄天祿多奇字方朔金門有諫書
相望西橋應不遠莫教風雨往來疎

林炫 四首

炫字貞孚閩縣人尚書庭桐子正德甲戌進士歷官通政司參議有榕江集

傷歌行

楚人不識鳳謂是五色雞魯人不識麟謂是麇而蹄天
時苟不值賢聖終見嗤爰居避海風享祀將奚為寄言

明哲士樂命安蓬閨

有感用杜韻

將帥承新渥軍儲惜去年似聞千里霧猶蔽九重天貴戚爭開府烽烟近到邊玉關何日閉遺恨自張騫

十四夜月

今夜揚州月清光已勝前遙升滄海外先到客亭邊雲度同飄忽風來一灑然細瞻金粟影猶少半分圓

次韻贈朱青岡太守郊行

聞得農人語鶯花未足憐夕陽牛背笛春雨郭東田政簡官如水時豐俗自便村村鳴社鼓歡喜說今年

孫存一首

存字性甫滁州人正德甲戌進士歷官河南左布政使有豐山集

劉都幕泉亭

濫泉沸山巔沈泉迸山足一鷺飲泉飛向西泉浴

周在四首

在字善卿太倉州人正德甲戌進士除知寶坻縣擢陝西道御史歷官浙江右參政有燕京逮事錄行臺紀興

詩話善卿獨據胸臆不事規撫正如繁音迭奏忽聆于蕙于曲縱無妙理具足清機

悼陳司李

保定推官被姦民誣奏死于獄

灼灼木槿花楚楚蜉蝣羽朝陽耀容華日夕不知處人

生非金石誰能不銷腐昨日同舍人今朝成糞土死者
已無知生者徒自苦獨坐掩園扉哀哀淚如雨

秋夕感懷

月轉虛簷向夜闌孤臣不寐望回鑿重門擊柝聲何急
半壁殘燈影亦寒梁獄久淹書未上齊廷難遇瑟休彈
凌風欲借仙槎去天上銀河水定乾

初下詔獄作

薄宦叨民牧窮囚與寇鄰

撫監有官民之分官監稍潔予獨下民監與強盜重囚雜處

不辭羅

法網直恐玷儒紳縲紲嗟何罪遭逢慨不辰鄒陽書未
上賈傅策誰陳日有泥塗辱旁無骨肉親吟髯纏鎖斷
鞭血污衣新野薤晨充饌乾蘆夜作茵亂繩沾食穢毒

蝟螫膚辛厄似樊籠鳥危如涸轍鱗經旬忘盥櫛長日
足悲呻竊共人愁語徒勞吏怒嗔獨行良踽踽羣吠尚
信信薄力誅求困虛情鍛鍊真株連殊未已文致竟無
因理直終何補錢多信有神虎翻令傳翼象莫顧焚身
禍已延吾黨冤猶念此民病亡俱老弱瘦死半飢貧地
下多新鬼天涯少故人禁嚴消息絕家遠夢魂頻自笑
心如鐵相看淚滿巾尚祈欽恤詔指日下楓宸

閨怨

江南二月試羅衣春盡燕山雪尚飛應是子規啼不到
故鄉雖好不思歸

桑溥一首

日言總卷三十五
溥字伯雨濮州人正德甲戌進士歷官按察使
榆林道中

迢遞榆關道西風卷客旌寒沙迷古塞落日下孤城水
險遮蕃騎山高列漢營君王方便武邊將莫言兵

顧可久 一首

可久字與新無錫人正德甲戌進士歷官廣東
按察副使有洞陽集

秋懷

異域滄溟上孤城斥鹵中經過稀漢使託處雜黎戎最
苦黃茆瘴兼愁鐵颺風 集本作日遠天何際雲荒秋不窮 誰能忍羈旅轉泊

逐飄蓬

李 濂 九首

濂字川父祥符人正德甲戌進士授汴陽知州
遷寧波府同知終山西按察僉事有嵩渚集 鳴

吾云川父詞藻俊拔迥出塵表 俞汝成云川父詩率意走筆不事鍛鍊有古朴風 錢受之云川父作理情賦左舜齊持以示李獻吉獻吉大驚訪之吹臺川父自此名滿河洛間久之讀書深思始知獻吉持論之頗而學者沿襲之繆嘗有絕句云唐人無選宋無詩後進輕狂肆貶詞真趣盎然流肺腑底須模擬失神奇又云洪武詩人稱數子高楊素凱及張徐後來英俊崢嶸甚興趣溫平似弗如當竄竊剽賊盛行之日獨具隻眼可謂卓爾不羣者矣

詩話嵩渚集凡百卷最稱繁富然不甚剪裁其持論以明初吳中四傑為歸求其神似未免類桓宣武之擬劉太尉也

游呂公洞

窈窕呂公洞逶迤玉泉側澗流緬松門石梁亘雲壁始
入日匿影徐轉天漏白靈窟度縈迴細徑緣欹仄杖邊

霏漸分衣上霰微積紫芝敷異芬瑤草弄明色窮猿倒
窺人仙鼠飛避客遙遙薜蘿陰嫋嫋蒼翠夕金膏欣可
餐石髓恨難識意愜諸妄遺神超萬緣釋伊子事沉冥
夙負山水癖曩聞呂仙名茲覽修真跡丹爐滅灰燼石
牀有苔蝕一遊洞庭波千載杳消息珪組知爾忘烟霞
恣所適私哂名利心踈躓竟何益

雪竇寺妙高臺

吾聞妙高臺海涌金芙蓉上有萬古苔虎豹留其蹤日
月挂天柱烟霞韜石峰所嗟異僧去寂寞青山鐘

含珠林

佛有舍利珠瘞之海東石夜來九龍爭風雨拔林柏六

丁紛呵護寶物安所宅至今月黑時光騰幾千尺

石竇

石竇海眼通乳泉四時洩仰睇杳而深誰剡翠屏裂青
巖千峰雲白含萬年雪膏砂原異竅烏鼠或同穴

桃花坑

高僧飛錫地錦石名桃花吾非勾漏令乃此逢丹砂雲
中吠仙犬洞底流胡麻定有逃秦者人烟隔暮霞

太原中秋

紫塞中秋月青天萬里情他鄉一尊酒獨對太原城水
霧戎戎合陰蟲故故鳴雁門諸戎苦莫遣照邊營

春興

碧草城南路不分野人詩思正紛紜聊隨謝客尋幽壑
何必桓譚識古文春日苦耽新秫酒洞天思謁大茅君
東風吹起花如霰腸斷梁臺日暮雲

秋懷

瀟湘楓落鱖魚肥楚客懷歸未得歸頻憶鳳城詢北使
尚聞龍舸駐南畿驚心關塞旌旗動旅食江湖諫疏稀
本乏涓埃裨郡國擬將生事付漁磯

良鄉道中

沙雁衝車起洲鶯隔岸聞暮看霞氣近疑是漢宮雲

蔣山卿

九首

山卿字子雲儀真人正德甲戌進士授工部主

事諫南巡廷杖謫南京前府都事歷刑部郎中

出知河南府改潯州再改南寧升廣西參政有

南泠集

顧華玉云子雲詩天才溢發可歌可感使將來者見之則

并氣格音節立之者皆可怛然省矣

俞汝成云南泠達生有容德詩

似其人

王元美云蔣子雲如白蠟糖看似甘美不堪咀嚼

云參政才華朗蕩五言學杜恨乏奇語

錢受之云子雲集自序謂

年學詩弱冠渡江見東吳顧吏部寶應朱戶曹教以讀漢魏晉宋唐人

之詩及舉進士始與同年薛蕙研工古作以其時考之子雲之詩發源

於金陵成就於亳州主於學唐不為勦杜其亦生於北地之後而不隨

其雲霧

者與

詩話子雲詩如水精淨域盡掃游塵微嫌境太淺爾子三人孝常孝若

孝或皆能詩吳山遙入戶江水近通渠孝常句也鴈度三更月烏栖獨

樹霜孝若句也夕陽新雨後明月落

潮時孝或句也雖未出羣亦自濟濟

門有萬里客

門有萬里客駕言發京都問客京都來世事比何如公

車待詔士北闕新上書崢嶸片言合恩寵一朝殊升君
白玉堂上君黃金塗賜與出內藏宅第夾皇居華榱鏤
璧璫文牕結綺疏珠履竝侍從紫衣備走趨高門平旦
開飛蓋已填衢官爵入掌握才俊待吹噓顧盼遺光彩
俯仰生榮枯貴盛豈不羨尊幸古來無天運相代謝日
月有盈虛時命苟未逢進取何所圖執戟疲揚雄文園
病相如今君守寂寞辛苦徒嗟吁

陳緯度云此篇蓋為羅峰而作

雜感

吾聞青海外赤水西流沙神人生鳥翼蓬首亂如麻出
入乘兩龍左右臂雙蛇中有不死藥奇麗更紛葩琅玕
墜珠英玕琪散瑤華雙雙相合併文文自交加我願從
之游萬里跡非賒但恐非人類壽命其奈何

夏日田園即事

二首

沉沉夜來雨泱泱川上平田家趁時作驅牛急晨耕遙
遙阡陌間肅肅老少并札札耒與耜伊伊桔槔聲紆迴
野水入綿延禾稼盈劬苦事一時倏忽見秋成四體雖
云疲所貴惟此生此生各有分胡乃不自營寥寥千載
下寧知沮溺情

東菑耘事畢老翁自閒閒鼓腹何所知徘徊墟落間斜
日上高原一望江南山塞林玩柔荑涉澗弄潺湲欣然
適其適日黑始來還了無一可說呼兒掩柴關

燕歌行

清霜落木寒蕭森白日既匿光景沉關山迢迢絕信音
目極千里傷人心念君他鄉久滯淫長夜展轉憂難任
空閨寂寞愁錦衾涕零如雨不可禁泠泠纖指彈鳴琴
張絃促柱發哀吟月明洞戶流清陰涼風飄飄吹我衿
起看樹上雙栖禽雄鳴雌飛守故林我何煢煢獨至今

灤縣晚行

漠漠平沙闊荒荒白日低朔雲孤鴈度昏樹亂鴉棲
鼓聽猶隔村烟望欲迷關山有戎馬憐爾尚征西

八月十五夜懷京中舊遊

今夕那無月他鄉獨上樓兵戈添白髮幕府滯清秋
料酒傷前事尋詩數舊遊呼童把官燭漏盡不能休

送林以乘赴任江西僉憲

并序

正德己卯上將南巡予與以乘孟循同上疏忤
旨下獄且被責貶而孟循死矣今上即位召還
京方忻會晤而以乘有茲擢感舊敘別愴然興
懷凡二十六韻

先帝昔巡幸小臣同上書事危攀折檻情切止乘輿未
得陳丹悵空令伏玉除天心那可問皇怒竟何如氛霧
昏霾久雷霆震擊餘傷魂逮圜鞞血濺衣裾半刺猶
憐爾孤遊孰起予聯翩嗟去國蕭索苦離居聖哲臨宸
極清明開太虛王綱重照洗姦孽盡誅鉏紫詔恩初降
蒼生憤始攄逐臣皆見召舊故復相於禁闥還通籍官

曹竝直廬感時唯涕淚歎逝重欹歔從宦心俱嬾求名
術本疎祇應旅進退敢望獨吹噓翻怪無鳴鶴堪憐似
戲狙十年才易組六月便驅車去作長途別行將大暑
祛涼雲停碧樹淥水汎紅渠南國秋風早西江白露初
霜威迎獬廌月冷改蟾蜍世路多欹側斯文有卷舒身
須混涇渭譽欲等璠璣霄漢看鷹隼江湖覓鯉魚與君
生死分分手一躊躇

南巡歌

萬乘回鑾出楚關遙聞鳳吹百花間聖心不為閒遊豫

千里河山一月還

薛

蕙

四十四首

蕙字君采亳州人正德甲戌進士授刑部主事
改吏部歷員外郎中以議大禮下詔獄尋復職

未幾罷歸屢薦不出有西原集

徐子元云君采俊麗康樂殆不是過 王子正

云西原窮探載籍采擷英華程古摛詞超入魏晉晚乃刊落繁華潛心性命造詣深邃自得實多今之人但知為詩人已耳 文徵仲云西原先生詩溫雅麗密有王孟之風樂府歌詞追躡漢魏時何大復李空同文章重天下摛詞發藻凌轢漢晉朝野翕然尚之先生雖稍後出而聲華望實略相曹耦 唐應德云薛詩從罪老書來得虛靜語 李子西云西原尚則元風韋祛末習漱羣籍之芳潤擷百氏之英華一時詞園翫焉寡儔 王元美云薛君采如宋人葉玉幾奪天巧又如倩女臨池疎花獨笑 穆敬甫云薛公理學著稱詩亦有致 顧玄言云考功詩譬之馬飾金羈連翩躩躩穩步康莊了無跼蹐之跡 黃清甫云薛詩吐辭秀潤布意密緻而調合作者名篇實多其咏懷則取法於嗣宗雜詩則準的於景陽游仙則規摹於景純雖不逼似庶幾太康之音 蔣仲舒云薛詩如刻錦雲霞疊石島嶼欲以人巧而擬自然未及大觀能無激賞間作冲澹若落花游絲情致可喜稍更骨氣便復無儔矣 陳仲醇云薛公詩一毫塵垢不入筆端由其胸中曠達無染故也 陳卧子云君采詩如貴主初降雲轡鸞輦輕珠編貝自然莊麗 沈山子云君采詩泓擘蕭瑟如鼓丘中之琴令人神往 鍾廣漢云君采五古兼

大小謝之長五律綜初盛唐之妙長句則效
李頎長律則宗子美絕句小詩亦多妙詣
詩話薛公南巡諍吏大禮正人條達詞華淵源理學古詩自河梁以暨
六朝近體自神龍以迄五季靡不句道字琢心慕手追歛北地之菁英
具信陽之雅藻兼迪功之精詣卓然名家又云君采年十二能詩王子
衡謫判毫州賞之曰可繼何李故其詩云束髮從師王浚川文章衣鉢
幸相傳爾時評我李何似白首摧頽只自憐其與用修論詩云近日作
者摹擬蹈襲致有拆洗少陵生吞子美之譏求近性情無若古調直以
沿流討源自許晚年究心講
學於詩不師擊壤尤人所難

君子行

君子思危懼不終日衆人居安沒齒自逸君子思退如
迫于淵衆人思進如逐于田損益之變何其相反苟非
明智孰能及遠人知其終莫知其始吉凶之萌鮮不由
已上天無私何怨何親福不擇家禍不索人道有險易
事有從違嗚呼小子慎爾所之

善哉行

來日大難痛心疾首今日為樂莫懲其後大難如何昊
天不嘉吉凶有時人莫之知鹿之游斯在彼中野庖人
調和將以為脯翩翩白龍好是魚服豫且射之載中其
目少康出畋不復其舍戎王朝卧迺縛尊下式戒在始
式備在終匪戒匪備害于其躬天命戾止匪夙則莫勉
爾在位無俾天怒

效阮公詠懷

七首

翔鷲赴長飈翩翩戾高冥舉翮覆白日伏頸雲間鳴顧
謝野田雀僂勉營此生與子各殊塗無用相譏評
飄風振玄幕若木零朱華六龍匿西山濛汜揚其波翩

明言總卷三十五
翻市中子於心太回哀不見顛顛色但聞慷慨歌卑危
誠未遠禍亂豈在多人人恤其私安能尚顧他已矣勿
重陳嗟予可奈何

朝登古臺上遙望大河陰朱明來自南隆暑倏已臨丹
霞曜陽景渥露霑玄林炎風振曾柯鳴蟬響哀音四時
代終始變化迭相尋盛長固殊昔遲暮方在今感物切
悲情愴歎傷我心

生才良不幸處世誠獨難揚蛾興妒階懷璧賈罪端靈
均既見放韓非亦自殘奉身失所從慷慨使我歎

天上何所有上有九重臺日月關房牖河漢界兩階白
虎夾路隅青龍啾啾啼五嶽當東脯四海充一杯衣裳
被雲氣左右結雙蜺彗星垂為帶北斗束為觥舉足歷
顛蒼往往不復迷朝集扶桑東夕降若木西

守道遺榮利趨物喪其真拙伸難竝觀高尚良可倫不
見玄廬子精神已無存煌煌口中珠含此誰為珍富貴
焉足求甘我賤與貧

朝游東海上親見安期生袖攜麻姑書揖予上天行忽
忽從之去一舉陵太清白榆何歷歷桂樹亦青青朱爵
七十二鼓翼相和鳴玉女顧我笑執手戲紫庭萬歲同
娛樂天地長齊并

游仙

精衛填東海筑筑累形軀哲人匡宇宙天命不可須聞

有山林士棄世以自娛願言從之游齋潔練羽書丹池
可止渴晨餐咀雲珠度紀諒非難去去勿躊躇

贈孟望之 二首

昔余與君子未見心相知邂逅在今辰果若平生時願
得結歡好贈子以新詩含意未及申行行復何之念當
從此去徬徨出郊畿行人倦止塗終言與我違倉卒執
手間歎息空相持媿無晨風翼送子起翻飛

踟躕郊野外白日匿西山行人去有期安得久周旋請
為游子吟與子結纏絲憂來動人心惻愴不能言言念
平生友意氣非徒然行役不足辭貧賤非所憐君其篤
明信慰我心惓惓

田中築舍修治樹藝

莊生卧濠梁范子去海隅行止信難侔遠跡要不殊伊
子慕棲遁脫冠歸里閭卜宅近郊坰葺宇就田廬南榮
面崇岡北牖背幽墟雖非山水地取樂自有餘築牖仍
先趾穿池即故渠林木盡舊行圃畦皆曩區寡欲罕所
營衆美亦云俱爵祿無常位貧賤亦安居豈惟畏淹留
得以免憂虞懽此平生情永言焉可渝

丙子十月二十八日初發鄉邑述征有作

旅宦忝從事卧疴輟歸田俛仰似昨日荏苒踰三年未
路謝貞素積習慚寅緣整駕別鄉邑薄言重徂遷瞻途
背梁宋振策指幽燕昔往遺維繫今來就糾纏豈伊行

日言終卷三五
一五
役歎畏此平生誓嬰世迫物累撫化懷冥筌齊契百年
內高揖千載前慮存跡匪虧意愜道仍全斯言俟明哲
因歌遂成篇

月夜坐憶

明月三五時流光千里外虛館風泠泠寒墀霜靄靄不
見南樓客徒憶西園蓋懽酒無盈觴憂襟有餘帶沉吟
靜夜思緬邈佳人會

陳卧子
云俊雅

詠燭

客醉北堂上花生夜戶中色亂歌梁月影暗舞衣風珠
簾照不隔羅幌映疑空願得陪長讌相看曲未終

雜詩 二首

植草會成蔓種木當為株休咎豈虛生景響不相踰呂
生釣奇貨蘇子挾陰符六國假相印萬戶割名都一朝
計不售倉卒蒙罪辜狙詐適自困傾巧定焉如生時諒
非榮既沒辱有餘達人安貧賤貴欲弭禍樞
玉以采自斲丹以澤自銷高才耀當時荼毒竟相招傅
子感飛蛾張公喻鷓鷯思患豈不微履險果焉逃嗟哉
世路間覆轍常所遭千金憚垂堂胥靡易登高願隨方
外士杖策歸蓬蒿

舟中看雨

微照下亭皋輕雲翳川曲一望春波上蕭條烟雨綠餘
花飄近渚衆鳥喧深竹借問同行子何處停舟宿

日暮

日暮坐東軒直望西山曲白雲藹藹至雨我牕前竹茲
晨憚隆暑披衣廢朝沐徙倚乘夕涼清風散炎燠大象
斡流行變化一何速日新諒無取年長祇多辱古人善
補過嗟爾當自勗

北征

地闊塵沙外天寒霜露中燕雲常少日朔氣自兼風夢
斷南樓鳥愁隨北向鴻淹留憶攀桂辛苦歎飄蓬

九日同何仲默出郊

九日登高會同人載酒來寒城一以眺秋色正堪哀零
雨晨初霽浮雲午未開南飛有鴻鴈為爾立徘徊

答王允升省中對雨見憶之作

康樂愁霖唱平原苦雨詩故人歌此曲贈我慰相思薛
荔垂青閣芙蓉汎綠池今朝一樽酒最恨不同持

送毛敬父之廬州

北峽吞淮口東陵控海隅霍山分岳鎮肥水混濡須從
事之官遠觀風問俗殊廬江多小吏應候府中趨

七月十五夜對月

嫋嫋涼風夕紛紛零露時秋來看明月風露已如斯况
對西園酌兼懷康樂詩山中有桂樹今夜足相思

六月八日西關遇雨

窈窕西清內參差水殿連歸雲向平樂飛雨集甘泉明

月裁班女迴風唱麗娟龍池初望幸來往木蘭船

重游蕭氏園

別此真如昨重游換物華粉滋曾倚竹紅淺舊看花沙
阪榮林曲山籬逐水斜城南咫尺路未覺往來賒

負郭

負郭茅堂小臨溪竹圃斜山樽移野客魚網曬鄰家荒
徑封殘雪疎籬透晚霞預思春到日著處種桃花

玄明宮後圃石山

出郭仙城近探幽福地遙珠林行窈窕錦石上峇峩雲
裏仙人酒山中玉女簫蓬萊去何許東望海邊潮

村居

寂寞村居僻荒蕪草徑深飛蓬來曠野啄木響空林薄
落聊凝望清江正苦吟此生甘落魄自笑果何心

送周子賢按貴州

萬里牂柯路炎洲百粵南懸梯穿鳥道流沫下龍潭赤
坂鼉鼉出玄厓日月含虹霓蒸海氣烟霧灑春嵐飛猊
緣篁竹垂援墮石楠橘花香細細藤刺綠毳毳嶺外青
驄馭臺中白筆簪秦冠高鐵柱漢節照金函行邁應多
暇登臨素所耽江山吟謝客物色助清談送遠都無緒
憂時且不堪安危廷諍地遲子促朝叅

送劉遵教赴河南僉事兼河北兵備

暫輟臺中妙兼分閫外名兩河開幕府萬里作長城卻

田言錄卷三十五
穀真堪帥穰苴本善兵追奔立表待傳檄據鞍成盜賊
空三輔烟塵埽北平閭閻無夜警部曲有春耕風勁吹
龍角雲輕抱翠旌遙瞻猛將氣偏逐使君行

寄崔內翰

病起身仍健秋來興不孤心情那可減肺氣欲全蘇蟻
穴依牀席蛛絲織画图塞帷窺物色倚杖理荒蕪撥悶
憑詩卷忘形付酒壺昔賢遺軌躅餘力誓馳驅良史傳
經術高才繼典謨赤鯨凌海水翠鳳上天衢仙籍通羣
帝文星近六符馬遷慙實錄劉向謝醇儒玄覽來神契
冥搜入奧區蓬萊披琬琰太乙下虛無顧我惟書肆知
君類說郭憲章崇闕里辭賦陋鴻都東魯宮牆闕西京
戶牖殊百家流汎濫六藝混泥塗未覩崩頽振深思筆
削扶飛騰愁失墜衰颯迫號呼落落親朋遠悠悠歲月
徂提攜如有分終願託微軀

送楊石齋

社稷功成後山林避寵年遭逢誰可竝出處獨超然反
側當前日經綸邁昔賢殷憂興聖主至治格皇天凶豎
同摧朽蒼生盡解懸廟謨隨指顧臣節見周旋智勇千
夫敵勲勞百辟先賞仍虛裂土名已重凌烟握壘慚周
勃揮金笑魯連急流嫌盛滿介石慕貞堅許國心恒切
還鄉興偶牽留侯初相漢樂毅晚辭燕異渥絲綸數高
風進退全草停黃閣詔花簇錦江船水檻星橋側茅堂

雪嶺邊雲霞深綠野卉木富平泉事業存鐘鼎儀型照
簡編累朝瞻翊戴四海憶陶甄白首歸休記青春送別
筵衣冠望行色端不異登仙

寒食對雨遣悶

一百五日春已深閉門風雨晝陰陰乍飛燕子濕無那
欲折桃花嬌不禁歸去久淹滄海興愁來端擬白頭吟
天涯節序堪愁思一作厭見繁華節更遣蕭條斷客心

贈繼之

長安城中不可留風塵日日使人愁上書解綬我將去
拔劍出門君且休五岳登臨幾兩屐三江來往一扁舟
東西南北好行樂與爾相隨萬里遊

孫氏沱西別業

巴陵西來沱水深水邊樓閣長一作陰陰鼉鼉夜出洞庭
岸虎豹晝啼雲夢林鼓柁乍逢漁父笑舉舟時聽越人
吟卜居何日從公去擬向桃花處處尋一作避地欲從何地
隱買山須就此山岑

流觴渠

流觴泛激水手攬跳波濕恰怪杯行遲風吹忽相及

雲洞

洞門雙玉扇隔岫窺雲霧裊裊三石梁苔滑不敢度

折楊柳

三月盧龍塞沙中雪未乾朝來折楊柳春色憶長安

涼州詞

隴西西去抵涼州邊塞蕭條處處愁
青草不生青海曲
黑雲常聚黑山頭

皇帝行幸南京歌

燕姬玉袖抱箜篌馬上常隨翠輦游
春來照影秦淮水
愛殺江南雲母舟

雪

綠水初冰百子池飛花正滿萬年枝
君王夜醉瑤臺雪
侍女冬歌白苧詞

春日漫興

二月黃鸝滿樹飛歌喉宛轉世間稀
謝公雖有東山妓
不及儂家金縷衣

顧璪 三首

璪字英玉上元人璘之弟正德甲戌進士除南
京工部主事改兵部歷郎中謫知許州遷溫州
府同知升山東按察僉事終河南按察副使有
寒松齋存橐

詩話英玉為東橋從弟東橋詩有落魄吾家蘇季子風流南郡小馮君
蓋謫牧許州時所寄也東橋關息園以延賓客載酒促膝諸亭朋簪滿
座伎樂雜陳而英玉居隔一牆臨街小樓曰寒松齋者坐
卧其上訓童子以自給所謂名教之外別有風猷者邪

再游石門洞

蒼然括東山百里縈青碧石門忽中斷窈窕開仙宅
遙窺日月深却轉烟霧隔中天屹樓居星斗挂几席
芳巖眩綺繡叢巘圍蒼壁山鬼不避人驚後嘯窺客
披榛上

孤亭奇觀壯心魄穹厓倚天懸瀑水半空射高流橫雜
佩直下垂正帛分作四山喧散為千頃澤初冬天未寒
晨曦映嵐赫重來意彌眷獨往任所適信美愜心期胡
為老行役終然脫塵網高舉凌風翻

游西山宿廣智寺待月

本來游客意欲與月明期碧海深何許清光望轉遲草
香聞露墜林暗見星垂幸對尊中酒殷勤坐不辭

壽州題壁

去郡今千里還家尚幾程春風楊柳色相送石頭城

劉天民 五首

天民字希尹歷城人正德甲戌進士除戶部主

事諫南巡受笞闕下改吏部諫大禮又受笞歷

文選郎中調知壽州累遷河南按察副使改四

川以計典罷有函山先生集

詩話函山諫草兩陳再笞闕下其調知壽州也故事京官外謫出都時以眼紗自蔽過部門選人擁其馬不得前函山擲紗于地曰吾無媿於官俾汝輩見吾面口可耳蔡鶴江送以詩云元祐黨人滄海外貞元朝士曉星前王耕原送以詩云君不見盤中紫脂蟹時昔橫行今安在又不見坐上虎皮褥當日負嵎思殺人世間反覆那可數御夫何事用心苦蓋以刺讒人也晚又以計吏罷憤懣不平恒逃于詞曲右云把俺這沒嫂嫂的陳平也串下一個招李中麓每稱之

漳河

雲寒不離水騰作漳河霧葭莢稅嚴霜蒼茫未能渡斥
鹵際廣野望之迴積素憶昔趙魏時兵馬日馳騫公子
納遊俠結轍滿皇路佐國無定謀中原徒指顧享費壯

士金招延詞客賦豪華坐銷爍曾如草頭露坐食三千
人化為萬年墓哀哉丘中墟遺蹤遍狐兔

巴田

巴田不成井逐壟細開塍灌水分山溜燒畬去野芳三
時勤不輟八口飽方能寄謝當塗子民心未有恒

謝豹

謝豹豈人化哀鳴自可憐無端啼永夜不為客孤眠悄
悄風歸樹娟娟月在天訴深情轉劇血盡眼將穿

渭南道中用韻荅黃汝庄方伯

隴水秦關道路均春風花柳著行新烏巾斜日久折角
白酒誰家堪入脣晚歲始醒蝴蝶夢故園今返鹿麋身
天涯尺牘勞相問猶是漁磯舊友人

宮詞

黃花細雨掩金鋪罷却鍼工一事無才報成雙又分去
人間博戲等樗蒲

鍾梁一首

梁字彥材海鹽人正德甲戌進士授刑部主事
進郎中諫南巡杖闕下尋出知濟南府乞歸用
薦補南昌知府有西臬集

感事

師老寒潮上民勞烈火中是誰司國計何以慰宸聰憤
世多才子平戎少令公杞人憂不細掩袂向東風

林春澤

二首

春澤字德敷候官人正德甲戌進士授戶部主事遷員外謫寧州同知歷吉安通判肇慶同知召為南京刑部郎中出知程番府有人瑞翁集

詩話百年以上壽世曰徒然或有過之者吾錄滕安卿詩既授崑山周大賓新昌邑翁相舉其本末矣候官林太守德敷百歲有司為建人瑞坊榮之集中喜立孫生詩云傳家十有三世老我百年仍四春蓋即於是年卒萬曆癸未歲也德敷子應亮戶部右侍郎孫如楚工部右侍郎

次潞河作

朝發都城闈夕宿潞河舟雁落沙渚淨霜降菰蒲秋天寒節物換河漢曉夜流回望郭隗臺黃金不可求廢興已陳迹懷古心悠悠

中秋清源公署

萬里秋光旅夜清空庭倚杖轉傷情月明偏照十戈地風冷唯聞鼓角聲東海魚龍俱寂寞南枝烏鵲尚飄零天衣欲把思無力愁絕長安北斗城

陳九川

一首

九川字惟濬別字竹亭又號明水臨川人正德甲戌進士授太常博士坐諫南巡削籍世祖即位復官遷儀制司員外轉主客郎中下詔獄謫戍鎮海衛尋放還有明水先生集

詩話明水釋褐忽曰漆雕開謂吾斯之未能信吾可自信與遂上疏請告歸謁陽明講學及官博士與舒修撰梓溪夏員外東洲萬主事五溪共諫南巡一時有四君子之目既司主客為羣小所憎重獲罪可謂信道之篤而九死不悔者也詩非所長亦小有韻致

題桃源圖

偶攜鄉里入山川一隔塵寰幾百年世上祇言秦網密
桃源也有不租田

戴 欽 一首

欽字時亮柳州人正德甲戌進士官刑部郎中

有鹿原集

同諸公寺中對雪

入寺金沙淨開林素雪飛風含珠閣動花傷藥闌輝酒
伴能相覓春筵賞不違仙郎有高唱轉覺和人稀

張治道 四首

治道字孟獨一字時濟長安人正德甲戌進士

授長垣知縣遷刑部主事有太微前後集

王于衡云孟獨

詩凌駕古今長篇如天馬行空 王元美云張孟獨如罵陣兵瞋目控
柳果勢壯往 李時遠云孟獨七言優於五言一時關中諸公當出其
下

與薛君采夜話

入夜杯仍把論交淚暗揮醉憐山一作城月上愁對海雲飛
江漢三年阻風塵萬事非故鄉南北遠猶恨不同歸

聞雁

何事天南雁春來又北飛為憂霜雪苦轉見羽毛稀江
漢愁余阻瀟湘笑汝違雲霄蹤跡異空有淚沾衣

白鷺

沙頭白鷺鷺飛向青山閣日暮行人稀還向沙頭落

清明日

草沒尚書履花迷御史驄長安佳麗處偏在曲江東

明詩綜卷三十五

明詩綜卷三十六

小長蘆 朱彝尊 錄

暨陽 蔣國祚 緝評

舒芬一首

芬字國裳進賢人正德丁丑賜進士第一授翰林修撰以諫南巡受杖謫福建鹽課司副提舉嘉靖初議大禮再杖歸卒有梓溪集

靜志居詩話舒公首犯逆鱗幾斃杖其撰宗德李君墓志中書本末最詳謹抄撮于左始車駕議以三月十九日壬子東巡祀岱宗歷徐揚抵南京下蘇州復泝江浮漢登太和山人情洶洶懼變將相大臣多從患之十五日予率同館先上疏兵部黃輦伯固陸震時亨疏亦上為太宰陸完所沮是夕夏良勝于中萬朝汝信過予憤惋邀太常陳九川至署名明日吏部張衍慶元承刑部陸倕天爵等疏亦入又明日禮部姜龍應賓兵部孫鳳鳴和行人余廷瓚伯獻等俱連疏入時又有太醫院醫士徐鏊以醫諫車駕不果出矣癸丑上忽震怒下黃輦陸震夏良勝

萬潮陳九川于錦衣衛獄以舒芬張衍慶姜龍孫鳳陸倭等百有七人
跪午門外五日而行人司疏不報以通政司應之也乙卯余廷瓚等俱
下獄丙辰同黃鞏等六人亦跪午門外五日梏拳是日工部林大輅以
乘等三人大理寺周子厚等十人亦連疏入丙辰俱下之獄亦梏拳跪
五日時復有金吾衛指揮張英言車駕出必不利肉袒戟刃於胃以死
諫天威遂不可霽戊午芬等一百有七人午門受杖四月己卯杖鞏等
六人發徐黎邊遠充軍林大輅周敘余廷瓚俱受杖時死杖下者陸汝
亨劉宗夏何孟循林質夫劉珏余伯獻孟子乾劉平甫李德卿詹敬之
李崇德十有一人崇德諱紹賢盱眙人以行人齋孝貞純皇后遺詔至
徐州開讀時羣闖勢熾多率屬吏視州衛官偃然席班首君立詔左從
容令去其席撫不得與職官同禮焉其文比之實錄所紀尤詳詩頗涉
理學語五言如江花迎載酒沙鳥避歸航菊黃三徑冷巖翠一松存七
言如水入柁楞流去響風吹魚網過來腥思家我亦愁千里為客誰能
耐十年紅粉滿樓初入趙青山百里尚圍燕芳草有情生夜雨天桃如
夢繞春山未如莊子舟藏壑欲買謝公墩結廬高樹開雲輕護鶴小橋
新水淺通魚芹香華屋來玄鳥樹暗青山隱杜鵑誰為剪殘今夜非獨
憐開盡故園花
皆為然有致

東流遇雨

歲晏東流縣江雲黯寂寥雨滋帆葉重風急浪花飄鴻

雁飛何遠蛟龍舞更驕客懷何處遣隔岸酒旗招

崔桐一首

桐字來鳳海門人正德丁丑賜進士第三累官
南京禮部右侍郎有東洲集

玉虛山行

是處瑤宮敞隨山羽客棲雲根百里路木杪萬重梯人
語鳴虛壑雞聲報隔谿桃源知不遠欲往路仍迷

夏言八首

言字公謹貴溪人正德丁丑進士授行人歷吏
科都給事中改翰林侍讀學士累官少師吏部
尚書兼華蓋殿大學士後棄市追謚文愍有桂

洲集

顧玄言云相君優於詞自成別調頗多豔藻 穆敬甫云夏公律法精嚴間出逸趣 李舒章云文愍詩頗長應制第有形模

而少

氣色

詩話貴溪游覽贈酬之作不及分宜而應制

詩篇投頌合雅不若素文榮之近於藜也

保定公館畫坐

重門掩長晝槐陰知午過瓦雀上階行青蟲抱絲墮公
暇亦憑几好風時入座終羨南村翁悠哉北牕卧

安鄉道中觀婦人插田

南村北村競栽禾新婦小姑兼阿婆青裙束腰白裹首
手擲新秧如擲梭打鼓不停歌不息似比男兒更膂力
自古男耕女專織憐爾一身勤兩役吁嗟乎長安多少
閨中人十指不動金滿身

無逸殿西壁詩應制

睿藻承遺訓農歌啓聖衷千秋所無逸七月詠豳風帝
學詩書在神謀制作同光昭文祖業原上有新宮

秋日同李序菴顧未齋張亭溪飲鄭氏莊

雨後沙全濕風前竹半斜野橋通細水秋圃映餘花出
郭悲塵鞅臨池憶釣槎清歌且終日應不問年華

夜泊吳江

月岸秋燈滅風湖夕浪翻橋連楓葉冷城帶水雲昏把
燭延津吏停舟次驛門漁歌起何處瀟灑數家村

漢川道中

晚市浮烟斂春洲曲水連遙燈林表亂圓月浪中偏犬

吠經村店蛙鳴逼稻田夜行三十里野興得蕭然

次薛西原

背郭茅齋僻沿堤竹徑斜
藜逢野客酌酒共山家
暖日熏芳草寒流漾淺沙
江村二三月歲歲足鶯花

象麓草堂初成和杜

水碧沙明洲渚迴籬深竹靜草堂開
風吹山木蕭蕭下日落江帆片片來
有客相過時載酒主人無事日登臺
愁看直北關山迴白草黃雲秋正哀

王邦瑞一首

邦瑞字惟賢宜陽人正德丁丑進士改庶吉士
累官兵部尚書贈太子少保謚襄毅有集

伏羌道中

曉發天水郡西行見城堡茅屋十餘家
周垣亦百堵門前挂弓箭牆上施樓櫓
居處雜牛羊街衢塞糞土危峰列戍臺
疾騎飛傳羽一夕烽火至居人自比伍
我從漢中來悠悠思往古此地戎馬區
從來多荼苦漢有隗囂據唐為吐蕃
部宋人扼金遼歲歲苦侵侮干戈如鼎沸
生靈飼豺虎皇天眷明德聖作乾坤觀
窮塞入版圖混一歸神武向來蹂踐場
禾黍皆膻膻承平思預防綢繆在牖戶
勿使邊防弛寇入臨洮府

蔡經五首

經字廷彝候官人後復姓張正德丁丑進士累

官南京兵部尚書總督浙直軍務改左都御史
為趙文華所劾逮至京論死追謚襄愍有半洲
集

詩話襄愍死非其罪郡志冤之國史白之虞山錢氏以為東南之論殊不然傳聞異辭不可不覈以余所聞趙文華病篤命禱其平生所陷六人襄愍其一則文華已心悔其誣且與楊忠愍同日死於市公論亦可定矣其詩特清婉無拔劍橫槊氣

同漳源侍御遊華不注峰并泛大明湖

平生慕幽曠雅懷避煩躑林園苟成趣亦足供逍遙况
茲出東郭雲物如相招羣山秀孌娜一峰特峒巖開筵
坐琳宇浩歌凌紫霄朋情藉軒豁客思翻飄飄曠言泛
蓮沼復爾移蘭橈窈窕遵玄浦逶迤渡七橋菰蒲水清
淺石竹風蕭條槐陰宿鳥下藻動潛鱗跳何緣對淑景

且幸聯高標因探歷城勝并采康衢謠

中山早行

客夢長不成雞聲起偏早既無夜寐安寧似晨興好銀
河澹欲沉朱炎寂猶埽搖旆指秦關駕車歷周道古塔
振風鈴高槐護芳草對此忘驅馳翻以舒懷抱

己丑陪祀南郊

歲序南郊重齋居北闕虔金輿下霄漢寶篆裊雲烟肅
穆千官靜歡呼萬姓傳天風引仙樂清切最堪憐

鷺湖道中

鷺湖山下春可憐野梅含雨柳生烟遊絲細細駐林杪
浴鷺悠悠飛水田物候催人如過客朝雲回首忽經年

征衣尚拂紅塵路，悵望鄉關落照邊。

蘭河曉渡

月落金城鼓角殘，危關曉色拂雕鞍。
黃河渺渺中原隔，紫塞迢迢邊地寒。
西望旌旗連瀚海，東來風雪滿臯蘭。
萍踪萬里休惆悵，虎節龍沙亦壯觀。

張

岳 三首

岳字維喬，惠安人。正德丁丑進士，除行人疏諫。南巡受杖，調南國子學，正入為武選員外。歷祠祭郎中，出為廣西提學僉事，調江西，謫廣東鹽課提舉。遷知廉州府，轉浙江提學副使，歷參政。以僉都御史撫治鄖陽，改江西，尋以右副都御

史總督兩廣軍務，召入為刑部侍郎，掌都察院事。復出總督楚蜀，卒。贈太子少保，謚襄惠。有小

山類彙

詩話襄惠初釋褐，與林希元陳琛談理學時，目為泉州三狂，始以言禮。忤永嘉繼作貴溪分宜，幸以功名終文治武功，所至登績詩其餘技，然如宛宛西飛，日餘光照我裳。江空流月華，白石光凌亂。理深物有悟，興極感相因。幽篁迷舊蹊，回磴距飛轍。微風萬里陰，落日半江烟。非熟精文選理者，不能作也。

留客亭

憑軒有所思，所思在遠岑。我有青絲瑟，欲奏無知音。
萋萋芳草色，遲遲美人心。佳期不可敦，離憂故難任。
冥迷風雨交，歎息河梁深。歸來卧山中，浪浪涕霑襟。
願乘空谷駒，翩翩夕巖陰。桂枝聊攀折，芳馨日相尋。
山阿華歲

晏莫受霜霰侵

同翁夢山游三海巖

夙愛山水遊茲山屢延賞披雲入青冥巖屋岓弘敞玲瓏開北戶峭壁排銀榜初駭溜石懸漸喜瓊芽長幽泉時一滴毛骨森蕭爽壺觴屢獻酬清言激靈響天末多風波陳迹成俯仰徒聞海上洲中宵勤夢想聊茲永日留真性非外獎暝色望征途何由釋塵鞅

與夢山登欽州東城樓

登高易為感况茲萬里心高城餘百雉翠色前山深詰屈水通海蒼茫日載陰美人隔宵旦末由攬芳襟舉手招青鳥願瑶華音青鳥不我顧瑶華日以沉耿耿遂

自念有酒且共斟

許宗魯

二十二首

宗魯字伯誠一字東侯咸寧人正德丁丑進士改庶吉士授監察御史歷湖廣按察僉事副使太僕少卿大理少卿以僉都御史撫保定以副都御史撫遼東有少華陵下遼海歸田等集

美云許伯誠如賈胡子作狎游隨事揮散無論中節 蔣仲舒云中丞五七言位置勻穩首尾妥潔氣格粗備可當作手使更推思入玄取材進古得不瀾瀾其言哉 黃清甫云許詩字句嚴飭篇章方整得古人之格白溝之作弔古慨今辭意俱盡志士讀之求見深衷定當擊節可謂無慙前作其近體雖多直語亦有爽氣曩秉鉞兩方戎事倥偬不廢文翰彌見其高 錢受之云東侯才氣宏放家本秦人承康王之流風罷官家居日名故人置酒賦詩時時作金元詞曲關中何棟西蜀易石浸淫成俗熙朝樂事至今士大夫猶豔稱之 詩話少華諸體皆工寓和婉於悲壯之中譬之秦箏獨無西氣足與邊廷實王子衡並驅

渡白溝

昔運溝屯厄恒紀變參商南風日不競朔吹亦遠揚英
雄各乘御龍戰血玄黃矯矯平將軍獨立當中央張弧
射九日撫劍盼四方事去迹故隳志伸願已償竭來歲
月久道里未能忘仲生固有為忽死亦其常停驂覽故
壘雪涕履戰場清川帶滌紆白骨浩縱橫惋歎不能發
總轡歌此章

贈楊伯雨

昔與君為別乃在黃金臺高歌易水曲落日悲風來今
與君相逢乃在廣陵郡朔雪滿江湖冉冉歲華盡與君
昔紅顏雙鬢忽已素日月如逝川東流焉得住酌酒勸
君飲援琴為君歌起望長江雲澹澹垂綠波丈夫有心
期結交共終始南山青桂枝豈為歲寒死

己酉元日作

檢曆年華改看雲歲色新地天開泰日星斗建寅春去
國身何遠趨朝夢轉頻江湖與廊廟憂樂竟誰人

三月三日

上巳今朝是風光異往時海雲成雪易塞柳得春遲目
極關山道情懸曲水詩誰能修禊遠一浣望鄉思

遼左雪中登樓

歲杪崇朝雪天涯絕塞城凍雲連海色枯木助風聲懷
土情無已登樓賦未成梅花南國思笛裏暮愁生

東岳

秩祀嚴東土明禋冠五宗金函神鬼籙玉簡帝王封海
湧中宵日巖留上古松何時凌截竊飛舉跨蒼龍

登岳陽樓

澤水含秋盛樓光向晚孤倚闌聞白鴈把酒對蒼梧楚
客悲今昔湘靈怨有無興來留賞地落日下平湖

零陵西亭同朱大參袞楊僉憲材賦

入洞探幽蹟登臺散遠心雷聲帶雨重虹影射江深地
接三苗國天垂八桂林來游陪二妙詞賦總南金

自清溪泛舟出江與柯元卿話別

清溪澹無色客子放歸舟浦暗黃花雨江行白露秋故

人惜遠別尊酒話中流漸近銅陵縣青山動我愁

送馮子言還吳

夢寐東吳好相違幾歲華憐君理歸櫂秋色滿天涯醉
詠江樓月晴看海寺霞春來如憶我須寄早梅花

自毘陵如姑蘇

仙舟搖極浦驛路指吳門海氣春冬雜風潮日月昏鴈
回書不到家遠夢空繁總是江南好何如歸故園

晚渡黃河

落日西山暗洪河夏漲餘昏黃沉鞏洛浩渺極梁徐鼓
聽臨流驛燈看遠岸漁頻年在行役倚櫂一長吁

西苑

畫閣橫青漢彫臺俯碧流苑雲低度雨宮樹早生秋水
抱芙蓉殿山連翡翠樓何須浮海外即此見瀛洲

徐氏南莊秋集

九月重逢閏一年秋未殘城南時載酒樓上復憑闌黃
菊霜前放青山雨外看病軀猶自可不畏倚高寒

立秋日曲江別業作

垂柳晝陰陰村居門巷深秋光來此日時序感吾心水
鳥浮沉浴風蟬斷續吟江臯餘暑在竹下且披襟

邊事

先皇神武竝周宣北伐親兵駐萬全飲馬幾思臨瀚海
銘功何止勒燕然龍沙夜靜妖星落虎帳秋高漢月懸

分闡登壇諸將老至尊宵旰獨憂邊

石首昭烈廟

永安宮裏龍髯斷石首山頭寢廟孤三峽風烟沉王氣
千年營壘識雄圖時移玉殿丹青古雪暗滄江雁鷺呼
噓燼可憐延漢祚遺靈猶見禱荆巫

醫閭春望同李戶部

醫閭登眺倚雄邊遼左封疆指顧全山勢北來連鞞鞞
海雲東盡辨朝鮮巖花競暖霏香雪塞草留春藹翠烟
公暇暫同淹永日喜無烽火報甘泉

登齊山樓

近郭危樓俯碧湍倦游孤客倚層闌淮淝山色尊前出

吳楚江流画裏看，旅思逢秋增短髩。鄉心隨鴈過長安，
黃花白酒登高日。玉笛金笳起暮寒。

班婕妤

妾命由來薄，君恩豈異同。自憐團扇冷，不敢怨秋風。

春興

野霽花爭發，川長柳漸齊。春光更何許，多在杜陵西。

城南游覽

楊柳今無渚，芙蓉舊有園。請看萬里地，即是樂游原。

戴

既魚四首

賢字時重，鄞人正德丁丑進士，除刑部主事，歷

官右副都御史，巡撫四川，有東石遺臺。李杲堂云中丞擅經

世才負氣高，元居官四十餘年，關節不至其門，權貴俱心憚之。竟坐此三起三黜，不得盡其用，論者惜焉。其詩老健蒼涼，是一作手。

感興

三首

高梧有良質，斲為雙綺琴。疏絃映金徽，泠泠發佳音。一
彈薰風至，更彈江月沉。大雅久以寂，志士寄幽吟。坐令
衆喧息，洞見太古心。

蘭蕙種不長，荆棘日以滋。青青野中蔓，引身百尺枝。春
風一吹拂，垂垂得其宜。夭桃開上苑，苦李道旁遺。賦命
固如此，物情胡不怡。托根各有所，聊用以自持。

離離庭樹花，風日正妍好。翻翻辭枝葉，忽已及秋杪。君
子心百年，小人計昏曉。請君平生志，慎勿事溫飽。

宣風公館作家書後用壁間陽明先生韻

明詩紀卷三十六
雲外微紅見燒痕道邊寒水入溪渾此時日落楚山館
後夜月明何處村已近閉關猶道路偶逢傳札念晨昏
獨燒官燭看妻子卧聽郵更驚夢魂

胡侍四首

侍字承之咸寧人正德丁丑進士除刑部主事

進員外陞鴻臚寺少卿坐議大禮謫潞州同知

尋下詔獄論為民尋命復職有濛谿集

王元美云胡承之如

病措大習白後公術操舞如度擊刺未堪詩話承之詩原北地而五言頗近信陽弇州稱之云雖於風雅未縣合往往時材骨格殊亦不失實

宴王御史惟人山亭

別館秋城側高亭夕霧中疎簾通野色曲磴裊天風醉

舞招松鶴悲吟和草蟲平生習池興遮莫笑山翁

九日同陳魯南文徵仲劉希隱薛君采登海印寺

鏡光閣

湖景澄珠閣雲虹度石梁行攀雙樹杪坐對九華觴水
抱香城入山橫紫禁長憑高不厭晚待月詠胡牀

送劉德徵守夔府

國有蠶叢古城聞白帝雄龍蛇夏禹廟雲雨楚王宮羽
檄通南徼樓船進北風還令蜀父老喜得漢文翁

涼州詞

落日黃河水倒流沙場旌旆風悠悠新降胡兒不解語
笛中吹出古涼州

陳文沛

一首

文沛字維德長樂人正德丁丑進士除工部主事歷郎中出知撫州府調蘇州遷霸州兵備副使以陝西行太僕寺卿罷歸有世槐堂橐

懷遠堡和韻

峭壁樓危石徒杠漫遠沙河流隨溜曲樹影逐風斜客枕移更鼓鄉愁起暮笳官齋何寂寞鄰舍兩三家

吳

仲一首

仲字亞甫武進人正德丁丑進士歷官南京太僕寺少卿有鴻爪集

送吳舍人使中州

茅土分封重天書十道開浮槎乘月渡飛鳥倚天迴南國王孫草西園驛使梅荆溪何處是遙在白雲隈

汪

佃二首

佃字友之弋陽人正德丁丑進士改庶吉士有

東麓集

苑口別意圖爲弋陽李生題

秋來苑口漲初生羨爾歸帆一片輕折柳離亭休弄笛客邊禁得斷腸聲

雨行

落花飛絮踏成泥煙雨連纖日向西行客正愁行不得鷓鴣偏傍馬前啼

林希元 一首

希元字思獻晉江人正德丁丑進士官至大理寺丞有次厓集

丁酉除夕有感

牢落天涯兩歲除夢中曾幾賦歸與聖朝未有寬恩詔
邊郡猶勞判事書忙裏不知殘臘去客邊惟覺二毛疎
椒盤此夜誰觴酒忽憶家鄉萬里餘

李士允 一首

士允字子中祥符人正德丁丑進士歷官陝西參政兼苑馬寺卿有山藏集

晚過劉中丞園

暝色延春徑烟光啓夜關綠深裴相野香滿白公山銀
燭回花底金壺侍竹間不妨山簡馬乘醉月中還

王漸達 一首

漸達字用儀番禺人正德丁丑進士授刑部主事建言不報乞歸隆慶初追贈光祿少卿有青

蘿集

洪舜臣云青蘿詩文如騏驎在御雖鳴
變節奏而若滅若沒之氣終不可掩

詩話青蘿詩無定格遣興即題鐵橋
一絕直追踪唐許碣閬苑花前之作

鐵橋

狂客山中不費招瑤池春宴夜聞簫醉餘不記歸時路
曾跨青羊過鐵橋

曹嘉 一首

嘉字仲禮扶溝人正德丁丑進士改庶吉士授御史以言事出補大名府推官尋復官御史又以言事下獄謫禹城知縣降茂州判官仍復原職升山西提學副使終江西右布政使有漫山

集

王元美云曹仲禮如公孫大孀弟子舞劍頗見淋漓見其師者不覺愴然

詩話王元美撰危言謂獻吉晚為其甥曹嘉所厄良苦而鄉黨之論不然朱秉器游宦餘談述汪人語謂仲禮終身父事獻吉勿衰梓行舅氏集選吳下以善書名者繕寫獻吉兄孟和有姊即仲禮母素與獻吉有隙恒不相見一日兄姊欲過獻吉獻吉喜劇盛供饌以談比入門獻吉出逐方揖孟和即路獻吉于階兄姊交毆之時仲禮在都聞之惶懼不寧者旬日專人以書慰獻吉是厄其舅者非仲禮矣仲禮好賓客所與游最密者詩則謝茂秦書則徐子仁奕則閻子明嘗語茂秦云吾舅氏稱詩家練字不如練句練句不如練意練意不如練格蓋墨守舅說若足以此知危言亦

有不足深信者
次韻答空同舅氏

兩度微官謫孤身絕塞行漢廷收墮淚蜀道軫離情玉壘蠶叢國龍標劔閣城乾坤形勝地何處挂冠纓

王廷陳 三十五首

廷陳字稚欽黃岡人正德丁丑進士改庶吉士授吏科給事中諫南巡杖謫裕州知州尋下獄

免歸有夢澤集

皇甫子循云稚欽樂府古詩齊軌潘陸下擬陰何五律並肩沈杜俞汝成云夢澤詩清切不

凡榮潤可愛王元美云王稚欽如良馬走坂美女舞竿五言尤自長城穆敬甫云稚欽如阮嗣宗日坐步兵厨醉態百出而自無寒酸語顧玄言云王給事調高趣新頗多奇句如深谷綿蠻冷然幽響殆與高岑方軌蔣春甫云稚欽五言漸近自然頗多佳境陳卧子云稚欽爽俊故意警而調圓李舒章云稚欽操筆不煩軒然鵠舉宋轅文云稚欽才情麗逸儻加以沉思當不減徐昌穀詩話稚欽逸藻波騰雕文霞蔚音高秋色豔春蘭樂府古詩既多精詰五言近體亦是長城固已邈後凌前足稱才子

擬矯志篇

蛟龍雖困不資凡魚一作鮪鷺鷥雖孤不匹鷺雛雖有香草
 當戶必除雖有仁人在敵必誅狐白雖美炎暑必置舟
 車之用易地則棄蕙蘭不采無異蓬蒿干將不試世比
 鉛刀以驥捕鼠曾不如狸餓夫獲璧不如得糜郭生純
 臣魯連高士彼乃登臺此則蹈海寧直見伐無為曲全
 寧渴而死不飲盜泉

放歌行

竊鈎者誅竊國者王仁義資亂道豈不臧一代秦者呂
 襲楚者黃巍巍國君大道在傍謂尺何短謂寸則長
 此不可度彼何可量獸殪罟裂鳥盡弓藏智勇既殫
 軀乃見殃讒巧為忠直夫稱狂出門異趨毀譽曷

解五樂不可極憂來無方游心沖虛以保壽康解六

妾薄命

春風轉蕙披蘭高臺曲榭中連經堂入奧張筵秦箏趙
 瑟俱前鳴絃度曲雙妍輕舉紈袖僊僊宛若游龍翔鸞
 翠盤金爵闌干呈能角技為歡種種厭射更端眼看陽
 景西馳高張蘭燭承暉車倦馬怠不辭但歌不醉無歸
 夜深坐促尊移含悰寫意向誰眾中色授君知願言竝
 蒂雙棲惡聞易別輕離佇立不勝傍徨獨宿寤言難忘
 何以報君明璫起視銀河爛光牛女咫尺相望終夜不

成報章陳卧子云調本于建聲情極合

行路難

北風蕭蕭雨雪滂辭我親友之朔方中閨少婦走徬徨
勸君斗酒牽衣裳道路縱橫多虎狼歲暮天寒百草黃
結髮本期不下堂君獨何為慕他鄉東流之水不西歸
宛轉蛾眉能幾時人生富貴亦有命辛苦馳奔空爾為

子夜春歌

初華錦繡舒千林望如一懷春廢機杼縑素難成匹

子夜秋歌

貪看秋月光夜久不成寢四顧寂無人玉階有雙影

對酒歌

二首

惠施已不作莊生寡所宣伯牙失鍾期抱琴誰為彈知
人誠不易知己良獨難周公輔王室管蔡乃流言骨肉

且不諒他人固宜然

人性稟靜躁物則準方圓錐刀各有能情好各自妍陰
霽難竝祈恩怨豈兩全於此雖不容於彼獲所安人無
億萬身何能徧周旋兼濟聖不贍榮枯有自然富而如
可求尼父願執鞭

詠懷

四首

兩儀立樞要萬事具紀綱智士運機權一童驅百羊羽
重金或輕尺短寸有長壯夫苟失據反為豎子傷獨繭
引六鼇纖繳連雙鷁操持貴不謬得失詎有常始悟制
人術豈在多與強

擊鼓以求亡疾馳以逃影驅介以乘高驂蹇以求騁揮

明言錄卷三十六
刀喪其柄振衣失其領趨舍昧良圖存亡在俄頃
姬旦制冠裳萬古承其賁偶以衣狙狽奔騰裂且棄承
雲本妙音鱗羽爭辟易魯門鐘鼓聲轉使爰居悻物類
何續紛人已非一致躔哉尼父言蓋各言爾志
昔聞有游女逍遙翔碧潯交甫下請佩解贈情亦深可
遇不可持變化愁予心影滅佩亦失漢廣無由尋眇睇
絕髮髯徘徊逮夕陰青鳥忽來過貽我金石音憂思耿
難忘寫意於鳴琴自傷非儔類感激長悲吟

雜興

偏才互短長名家殊去取連城償燕石千金享敝帚不
識東家聖翻謂西施醜定價豈目前知己俟身後

閨情

種木期息陰結交期得心與君初婚時安坐調瑟琴繫
我大秦珠貽我玳瑁簪攜手同車遊徘徊步春林俯拾
竝蒂花仰聽和鳴禽折芳交贈持言誓一何深寧期被
讒妒棄我忽如沉曠歲不一接塵埃生錦衾明月入空
帷中夜坐悲吟發篋理故物淚下誰能禁

別張子言

我友駕言邁去去之朔方晨起促中厨爲我具酒漿長
別在須臾且願盡杯觴昔爲骨肉親比翼雲中翔今當
永乖違邈若參與商出門異鄉縣居世如朝霜世途轉
傾側良會安可常羸馬感人情哀鳴衢路傷悲風振喬

明詩紀卷三十六
林颯颯摧中腸執手不能辭淚下霑衣裳恨無凌風翰
送子還故鄉

別曹仲禮 四首

與君一為別晷度逝不停奄忽二十載親串日以零短
者已物化存者非壯齡况復異鄉縣散處如晨星但言
長相思豈意今合并顏鬢各已改不易惟茲情孤鴻號
朔風黃鳥聲嚶嚶飛鳥戀儔匹况乃稱友生

別子大河側見子長江濱對面但疑歎含意慘莫陳豈
無新知歡念此同袍人攀留不須臾羲陽忽以淪奮身
思繫日天路邈無因安能附高翮一舉摩青旻飽者豈
念饑貴者羞賤貧薄終古所尤交誼貴在伸故心苟不

移何必會合頻慷慨即長路無為兒女仁

中夜起相送白露塗我襟低頭惜分手舉頭傷辰參斗
酒良不薄對之不能斟唧唧草間蟲助我揚悲吟為君
拭綠綺彈作清商音物理關人情淚下不可禁谷風刺
小怨孔公贊同心延陵輕寶劍高義垂至今親交信不
薄先民良可欽

泠泠山下澗童童山上松粼粼澗中石瑟瑟松上風波
逝石不俱颺奔松莫從物理相倚藉動息難可同與君
游宛雒矯若雙飛龍中道悵相失末路欣此逢既逢不
須臾去復當嚴冬霜霰集衡輓虎豹啼林叢子其慎桑
榆勞謙以令終

駕幸南海子

南郊初禮帝上苑復誇胡虎兕先聲伏車徒翼輦趨網
羅張一面部曲用三驅侍從羣臣在應知諫獵無

江上言懷 二首

野闊風雲入天迴楚蜀通渚禽多白鷺巖樹半青楓哀
怨湘君曲平成夏后功晚來懷古意極目送冥鴻
平野蒼烟合高城白鳥過澤蘭懷楚客石竹隱湘娥谷
響歸樵唱江鳴發櫂歌夕陽葭菼外將奈暮愁何

楚眺

眺迴臨高閣三湘萬里餘草邊雲夢獵花下武陵漁白
日山川氣清秋水竹居仙蹤同霸業消歇總愁予

李沔陽自大梁經裕州因贈

雪夜梁王宴霜秋宋玉愁回瞻嵩嶽峙去逐楚江流少
室三花樹滄浪一葉舟南行正搖落知爾憶林丘

張子魚過訪

故人天上至清宴夜深開澤畔微芳度江臯暝色迴楓
林停翠幘月岸擁金壘正苦歡娛逼無令候吏催

生日有感簡同館漢東少泉二子

五十年來是行藏往日非因之念親舊存者亦幾希弧
矢心猶壯文章力已微操觚從二子衰薄謝餘暉

宴魏子園亭

池館名江國賓朋實楚材屏間烟霧濕鏡裏芰荷開窄

明詩歸卷三十六
以吹笙下魚因鼓瑟來邀盡一作歡須秉燭歌妓莫頻催
病中得顏子書并見示諸作

卧病當寒景空齋正爾思五禽終日戲雙鯉遠方貽久
著潛夫論初傳幼婦碑君才猶不用如我復何悲

春日山居 二首

野曠林爭出花深徑屢迴春風芳草外亂水白雲隈燕
接飛蟲去鶯沾落絮來小堂宜竹護一一荷鉏栽
草動三江色林占萬壑情籬邊春水至簷際暖雲生溪
犬迎船吠鄰雞上樹鳴鹿門何必去此地可躬耕

山莊雜興 二首

老夫諳稼穡次第葺園廬對酒惟田父呼門絕里胥桑

麻經雨後花竹宛秦餘如此生涯足何勞薦子虛
事去心逾壯年來迹轉孤濯纓臨漢沔安枕荷黃虞春
澗偏魚鳥秋牕近竹梧出逢鄰叟飲醉倩野童扶

聞箏

花月可憐春房櫳映玉人思絲織指亂愁劇翠蛾顰授
色歌頻變留賓態轉新曲終仍自敘家世本西秦

病後荅友人

一畝居連郢客鄉三年愁隔漢川長青山各有幽棲志
白雪遙傳寡和章自傷雲霞開藥圃不將塵土灑荷裳
洞庭雪後烟波闊花底乘舟到草堂

燕京元夕曲

香車一一渡星橋翠袖雙雙引玉簫但訝遊人爭辟易
不知夫婿漢嫖姚

江暉四首

暉字景孚仁和人正德丁丑進士改庶吉士諫
南巡杖闕下出為廣德州知州召授編修進修
撰升河南按察僉事有亶爰子集陳卧子云景孚好
怪合者亦六朝之

遺
詩話景孚穿文鑿句辭必自鑄其文有令繼闕始理訓闡詰範已邇
臬揆原命稽羃九篇誦之若神經怪牒蓋傲魁紀公而作王稚欽贈以
詩云江生突兀揚文風千奇萬怪難與窮博物豈惟精爾雅識字何止
過揚雄古心已出丘索上邃旨或與神明通求深索隱不肯置一言忌
使流俗同令弟大篆逼鐘鼎絕藝取作斯邕等生也為文遣弟書一出
皆稱二難竝縱有楚史不可讀滿堂觀者徒張目少年往往致譏評生
也不言但捫腹讀未終篇覺殷仲堪之眸子裴叔則之頰毛
傳寫畢露矣景孚詩稍文從字順然豈可與稚欽竝稱邪

別劉子謙

天運無停機變化一何速四時更迭謝寒暑互往復雷
霆促晝陰霜霰棲寒谷萬卉隨隙光安能久蕃育傷彼
蕙蘭花凋零竝蕭藪芳蕕竟同岑賦命焉可卜

前上陵德勝門

先皇巡狩日此地即行宮拜舞千官肅飛揚八駿雄雕
弓開塞霧鼉鼓振山風今日鯨華歇重過恨不窮

謁康陵

五柞淹珠葆千杉閔玉襦靈山鍾自肅虛殿珮仍趨雪
暗蛟龍蟄雲寒燕雀呼塵沙迷列岫何處訊蒼梧

感聞

南極雲山阻中天貝錦盈如何去與住俱似甯中行迂
拙甘衰病飄零寄友生秋風蓬戶底蕭瑟旅魂驚

馬汝驥 三首

汝驥字仲房綏德州人正德丁丑進士改庶吉
士諫南巡罰跪闕下五日受杖出知澤州召還
為編修歷修撰國子司業南京右通政南京國
子祭酒升禮部右侍郎兼侍讀學士卒贈尚書

謚文簡有西玄集

王元美云馬仲房如程衛尉屯西營斥埃
精嚴甲仗雄整而士之樂用之氣 顧玄

言云侍郎優於律取法初唐尤多華整但少情性耳 黃清甫云仲房
詩整練似法顏謝隊仗森然且關中之產氣自不薄雖求之聲律未造
其深亦不失高流也 蔣仲舒
云仲房詩有沉理而無玄趣
詩話仲房派沿北地由其體鈍存滓祿
五舍神明雖與稚飲齊稱去而千里

酬明卿見遲之作

違時寡朋侶在世有羈縛雖抱投沙懷中欽臨海作美
人惠前顧軒車戒雙駱探幽肆廣筵握炙行高爵宴晤
稽故懽告別附新諾沁渚旣縣芋樓峰復聯絡捫蘿情
易暢攀桂興欲躍嚴程豈迂遠郵館祇淹泊復往瑤華
篇報桃恥涼薄吁嗟山水音非子諒誰託寄言儲醇醕
俟我乎偕樂

藏舟浦

鳳殿臨瑤水龍舟鑠白雲樓臺疑上漢簫鼓憶橫汾地
豈昆明鑿波猶太液分昔年浮萬里蘭桂詠繽紛

芭蕉園

路轉山樓直園開水殿低碧荷春檻出紅藥晚階齊釣石蛟龍隱歌臺鳥雀啼翠華當日幸一道綠天迷

劉士奇 一首

士奇字邦正廣州順德龍門人正德丁丑進士除

刑部主事諫大禮杖闕下遷郎中出知梧州府

歷山東右布政使

秋夜旅懷

為客方如晉還家復入秦音書徒屬望燈火自相親草色連朝改砧聲向晚頻那堪千里外猶有未歸人

王 謳 二首

謳字舜夫白水人正德丁丑進士除工部主事

遷刑部員外出為按察僉事有彭衙集

王子衡云舜夫如敗

鐵網取珊瑚用力堅深得寶自少 康德涵云舜夫才情之妙近日罕視典麗咸備機軸不凡蓋作者之雋也 蔣仲舒云舜夫頗饒氣格兼多沉思惜其純駁相半如披沙揀金治璞取玉殊勞匠手 錢受之云舜夫有高才而無貴位故多煩促唯殺之音五言隱秀時可尋味七言專力學杜古體多率易而乖音節今體每纏絲而乏神理然視關中同時許伯誠馬仲房之倫則已超乘而上矣 詩話舜夫詩多至千六百篇譬田甫田種豆成莢若苗有莠當屬關中下農夜行一篇其汗菜之嘉穀乎

夜行

夜行如在旦殘月清林光雲氣集深澗露華生早涼白沙鬱浩浩翠壁凝蒼蒼寂歷松柏徑經過花草香雞聲互村落曙色動柴桑即事况多感離心含永傷

送姚方伯

野日流沙白山城落木黃秋來長送別何處折垂楊

汪應軫 一首

應軫字子宿紹興山陰人正德丁丑進士改庶吉士諫南巡廷杖出知泗州嘉靖初召復館職授給事中出為江西按察僉事有青湖文集

仁葉

甫云先生以沉鬱澹雅之思出以溫厚和平之詞譬之太羹味之正也

詩話青湖知泗州康陵南巡中使傳旨俾進美人善歌吹者奏言泗州僻左婦女不諳歌吹惟民間醜婦能蠶儻納之宮中受蠶事庶於治化有裨遂寢事雖迂而實可傳也及卒鄉人私謚曰清憲先生蓋司諫為直臣牧民為廉吏講學為醇儒皆第一流也其論學詩云語道豈捐陸扶世當從朱黜然思聖功二家皆真儒審擇於鵝鹿之間非偏黨陽明可知

登浮峰寺

攝衣入空山白雲留我住我欲卧白雲白雲又飛去

王鳳靈 三首

鳳靈字應時莆田人正德丁丑進士歷官參政有筆峰存橐

次梁學泉吏部徐州舟中夜酌之作

石仄江逾勁峰迴日易斜歸鴻迷極浦飛鷺落平沙越客同杯酒春光正柳花相看仍意氣行路莫深嗟

送林遷于得告還山

祖席初分酒半酌相看無奈故人何生憎柳色臨岐路况聽春聲入櫂歌舊國雲山何處是他年風雨憶君多祇緣簪組能相絆未得相從訪薜蘿

次韻贈送鄧文溪刺維摩

青瑣黃門記昔遊諫書常出殿西頭須知九死當年事

豈分孤身萬里投瘴雨蠻烟仍壯節海雲江月重離憂
最憐號泣攀轅意誰為中原赤子謀

吳鼎一首

鼎字維新錢塘人正德丁丑進士歷官廣西布
政司參議有泉亭集

讀史有感

漢武雄才世莫倫輪臺一詔見天真滿朝都入平津閣
猶有淮陽卧病人

陳良謨一首

良謨字中夫安吉人正德丁丑進士除工部主
事歷官貴州參政有天目山房彙

三窮辭為周侍御作

菰塘霜冷高烟平孤雁失偶中夜鳴深閨發婦心獨驚
蘭膏無燄爆有聲盈盈淚落如斷縈妾心有苦誰則知
上有舅姑下有子與爾同生不同死

陸金一首

金字德如吳江人正德丁丑進士授工部主事
歷官江西按察副使

宿京口驛

風帆如馬過維揚滿目烟花路渺茫江上潮痕收暮雨

詩話中夫生十月而孤母都夫人躬教之學既第奉母入京邸水滸
小舟中夜呻吟母責之曰貧生出入徒步若初入官便思安逸縱此
念吾立見汝敗矣中夫泣伏罪歷任以清介聞歸田後入峴
山社年已九十賦詩云風駕侵寒露歸帆拂暮星興復不淺

渡頭人影立斜陽十年季子裘應敝三月王孫草正芳
今夜月明京口驛計程應喜近家鄉

許相卿 四首

相卿字伯台海寧人正德丁丑進士官兵科給

事中補禮科致仕有雲村集

董實甫云先生詩悲壯沉著格調高遠

詩話雲村澹於宦情居紫雲山四十年風花雪瀑游屐遍於巖椒而不
一入城市其卒也聞人嘉言輒以詩云平生城市無雙屐何物榮衰到
兩着蓋實錄也詩取適意集出其手刪自序謂棄其脫遺不可讀者存
其餘可讀者自題絕句云雲村病老語多嗔造次詩成雜宋腔還潮開
元論風格拾遺壇上樹旌幢由今誦之諸體亦自清潤不全雜以
宋腔也若老如舊曆渾無用病絲殘燈亦暫明此則宋腔之佳者

古意

新月生西嶺明河低遠林坐見大火中秋序忽見侵感
歎老將至徘徊勞我心勞心復誰語聊撫東廂琴調高

曲未竟寡和難爲音矯首文江子何時宣此襟

諸弟夜集

獻歲閔霖潦今夕欣澄和况我遠行歸兄弟會匪他晏
晏言笑洽楚楚壺尊羅東風舉衣袖明月在庭柯一觴
再三詠舞影時婆娑荏苒百年內白日如投梭載懷秉
燭游不樂如夜何

晚晴

苦雨連旬日初晴一振衣殘雲依海嶠新水到柴扉僻
性嫌山淺塵緣與世違斜陽疎樹裏清影石邊歸

霽色

霽色林廬晚愁吟野水灣斷雲虹外雨殘日鳥邊山海

宇堪流涕朝班祇強顏獨嗟身世拙早見髻毛斑

楊士雲

五首

士雲字從龍雲南太和人正德丁丑進士改庶
吉士授工科給事中歷戶科左給事中有弘山

集

詩話給事未老抽簪自號九龍真逸坐卧小樓訂尚書蔡傳之得失極
黑水集證自春秋以來迄於元季歷代人物各詠以詩又取天文曆象
律呂及皇極經世書地志皆分題成詠可謂好學也已其詩原出白沙
定山近取裁於楊用修同時吳懋以給事及王廷表胡庭祿張含李元
陽唐錡為楊門六學
士六人皆滇產也

四望謠

望蓬萊駕蒼龍棗如瓜獻木公

望崑崙驂白虎觴九霞進王母

讀尚書

二十八篇今自漢伏生授二十五篇古至晉梅賾奏二
十八宿外二十五宿又仲尼不可作誰復百篇舊

八月十五夜月

今夜中秋月當圓尚未圓人皆瞻白兔我欲問青天把
酒須來夕高歌似去年盈虛誰握算擬測子雲玄

春事龍關作

春事今過二月中登山載酒喜相同三點兩點社公雨
十番五番花信風子規啼血欲半夜蝴蝶掠香時一叢
醉餘白石高歌調日落水流西復東

曹

弘 二首

弘字毅之江陰人正德丁丑進士除知南豐縣
入為監察御史西川清軍以病還里有方湖集
御史馬子箏朱必東季明德陳良會主事林汝恒
俱以言事忤旨罷職謫官於其行詩以送之
海樹連雲暗燕花帶雨飛啼鶯三月暮逐客五人歸聖
代昭臣直危言犯主威賜環應有日留却舊朝衣

下夷陵

溪花丰茸溪雨涼雲水不分前路長山鳥一聲山竹裂
思君半夜發瀟湘

朱

豹

三首

豹字子文上海人正德丁丑進士知奉化餘姚

二縣擢監察御史出知福州府有朱福州集

送顧經歷之福建

京華倦羈旅憂思喜南天烟柳山頭驛春溪樹杪船官
清蓮幕靜地暖荔支鮮况值干戈少詩篇紀歲年

秋日遣懷

雲物蕭條僧舍荒砌封蒼蘚半迴廊坐來草樹俱搖落
望入關山更渺茫憂國淚邊秋色老思家夢裏雨聲長
臨風却羨天涯鴈去啄江南晚稻香

寄程以道

隴梅隄柳又春風客子光陰似轉蓬此日天涯千里隔
昔年花底一尊同西川蹤迹孤雲外南浦離愁細雨中

早晚瞿塘新水發雙魚煩爾下巴東

袁淮一首

淮字伯昭任丘人正德丁丑進士歷官知府有汾淮泗西征諸集

秋夜宿埃馬驛寄舍弟渙

月騎停沙浦風林出驛樓青燈萬里客玉露九霄秋失路添星鬢還家滯驛舟未成春草夢徒有越鄉愁

廖世昭一首

世昭字師賢懷安人正德丁丑進士除知海州改國子博士卒于官有越坡橐

定光塔登高

寶塔層層上危欄面面開秋城圍野曲遠水接天迴日射珠光迴風迎鐸響哀長安知萬里目斷朔雲堆

郭波一首

波字澄卿閩縣人正德丁丑進士戶部主事有巖存橐

宿坪塘鋪

獨樹郵亭影千山征路塵東鄉今夜月偏照未歸人

明詩綜卷三十六

日言總卷三十六

三

